


KWIMANA PANKACI

 Twasakidila, Mwaneetu Neville. Tushaalaayi biimanyine kuulu bwa katanci kakese mpindyewu, patudi twinama bwa disambila apa. Twinyikaayi mitu yetu. Nenku kwôkô kwikâlè dilomba dya pabwadi, swayiku nudimanyishe anu ku byanza byenu byela muulu cyanaana. Mpindyewu shaala mulame munda mwa mwoyi webe bintu byûdi naabi dijinga abi, ulombe Taatù wa mu Dyulu bwa Yèyè kukwenzelabi.

² Taatù wetu wa mu Dyulu, nyewu tulwa Kûdi mpindyewu mu Dîna dya Mukalenge Yesu. Tudi tulwa, biikâlè twitabuuja ne bintu bitudi tujinga abi bidi ne cya kumanyishiibwa mu disambila, ne bu twêtù mwa kwitabuuja ne tudi tupeta bitudi tulomba abi, nebiikale ne cya kutupeebwa. Mpindyewu mulayi awu mmulelela anu wa menemene. Bidimu byônsò ebi, tukaadi baCimonemone citeeciibwe, ne tudi bamanye ne nCilelela. Tudi baswe kwanji kuKwela twasakidila, dyambedi, bwa dilama dya myoyi yetu ne ditwanyishila bwa kwalukila cyakabidi mwaba ewu, bônsò pamwe, badisangishe kaaba aka mu disangisha dya Mukalenge.

³ Tudi tuKwela twasakidila bwa ekeleeziya ne bwa mpaasata, ne bwa Bulelela bunene budiye mwibakilapù kaaba aka ne budiye utwa nyama ku mikolo. Tudi tuKwela twasakidila bwa muntu yônsò udi mu Bwikadi bwa Nzambi. Ne tudi tulomba bwa Wèwè kudileejaku mwena luse kutudi, leelu ewu, ne bwa kutupa dyumvwa ditudi naadi dijinga, bwa twamona mwa kwikala musadidi wa mutambe kwikala uKukwacila mudimu bilenga. Dijinga dya mwoyi wetu ndya kuKukwacila mudimu ne kaneemu ne mwoyi wa lulamatu, ne bwa Wèwè kupetaku cidi citambe bwîmpè cya mu nsòmbelu yetu. Dituku dyônsò, swaku bwa mushindu wetu wa kwenda wikale wa Wèwè usankishiibwa bilenga bwa bintu bitwikala benze diine dituku adi.

⁴ Mpindyewu tudi tulomba bwa babeedi bônsò ne badi mu lukengelu, leelu ewu, bàdi bàsanganyiibà mu Bwikadi bwa Nzambi kaaba aka abu, ne mu bwikadi bwa myaba Yebe ya cijila myaba yônsò pa buloba, bwa Yehowah munene alwe mu bukole Bwende ne ondope babeedi bônsò ne badi mu ntatu. Wadipetalaku butumbi ku Dîna Dyebe dinene! Beneshaku munsokontu wônsò wa mu mwoyi, mu dinda emu, wa malomba ônsò a disambila awu. Tudi tulomba, mpindyewu, paudi Wèwè utangila panshi mu mwoyi ne mwoyi wônsò ne umona ne kuvwabo batume meeji nku cinyi pavwabo beele byanza muulu apa, nenku ubapeesheku dijinga dyabo. Kabidi utubenesheku patudi tutungunuka ne diKukuukwila apa. Ne patuumuka mu citanda eci mu dinda emu ne patwaya ku mbanza yetu, swaku bwa twêtù kwikala bakumbane mwa kwamba bu bavwa

bafumina ku Emawuse abu ne: “Myoyi yetu kayivwaku yilakuka kapyra munda mwetu pavwaYe wakula neetu mu njila apu anyi?” Tudi tulomba nunku mu Dînà dya Yesu. Amen.

Nudi mwa kusòmbaayi.

⁵ Ndi muswe kwamba ne mbîmpè, mu dinda emu, bwa kwikala cyakabidi kaaba aka mu disangisha dya cisamba, mu Bwikadi bwa Mukalenge. Nunku kukaadi ndambu wa ngondo kacya ngaalukila. Ne mu dyalumingu dishaale edi mvwa ne meeji a kulwa, kadi ndi—ndi ngeela meeji ne kacivwa diswa dya Mukalenge to. Mu mushindu kampanda, cibandabanda cya muneemu eci cidi cimpangisha mêmè bukole bwa mubidi. Pândi anu ne ngaafiki mu cibandabanda eci, mubidi wanyi udi ubengangana ne kapeepa kadi muneemu emu aka, ne bijûji bidi binjuuka pambidi pajima. Ne ndi ngeela meeji ne bijûji abi mbiye kabwela buludi too ne mu cifu, ki mêmè kusaama bikole mu mushindu wa ne, mêmè. . . nzakalala, ne nkanka, ne mashika makole. Nunku ncivwaku mwa kupeta mushindu wa kulwa to, nansha mûmvwà mujuukile kuulu nditacisha bwa kwenza nanku. Nunku ndi—ndi mumanye ne ndi—ndi ne. . . Cibandabanda cidi cipangishangana bukole bwa mubidi bikole, ne cidi cipangishangana bukole bwa mubidi nenku—nenku kabyena bikengela mêmè kusòmbelamù to.

⁶ Mpindyewu tudi baswe kufila mulubu, tudi bapicile mu bikondo bya dicyonkomoka mu masangisha a Mukalenge, mu bitupa bishiileshiilangane bya ditunga mwamwa kùvwà Mukalenge mutubiikile bwa kwenza mudimu. Nunku mpindyewu mêmè ncivwa mutekemene ne nênyiiishè pa cintu kampanda cya cisunguluke mu dinda emu to, kadi Mwaneetu Neville uvwa muswe bikole bwa—bwa mêmè kwambaku cintu kampanda mu diikalangana dyanyi ne bantu kaaba aka. Pa nanku ndi. . . Yêyè utu anu misangu yònsò ne musangeelu mu mushindu awu, mutùtù bônso bamanyine Mwaneetu Neville amu. Ne twètù tudi banange Mwaneetu Neville. Mpindyewu, kakutuku kupita dituku dîntù nciyi ngeela meeji kudiye ne mukajende ne famiye wende to, ne bânà bende, mbasambidila. Nzambi amupeku dikanda bwa kutungunukaye, bwa kuya anu kuya! Bu mutudi bamanye, cikondo cyetu cidi cyenda cisheepketa. Tukaadi anu pabwîpi menemene ne. . . wa maalaba, bwa Makênkè a diloolo a leelu ewu. Nunku ndi. . .

⁷ Famiye wetu udi usanganyibwa ku Wesete. Twètù bônso tudi anu bîmpè. Nunku nkaavwa mwele bujitu bwa kilô itaanu ne citupa, kadi ndi muyijimije inaayi ne citupa kacya ngâlukila. Ne Billy Paul mmwele yêyè bujitu bwa kilô mwandamukulu ne ndambu. Ne Rebekah ne Sarah ne Joseph, bônso mbeelee anu bujitu. Mu bushuwa bwa bwalu, mukajaanyi yêyè kî mmwele bujitu to. Nanku—nanku ncyêna mwa kudidinga kwamba ciine aci ku cyambulu eku to, nudi bamanye’s, bwalu’s ndi ne cyà kwalukila kumbelu paanyima paa katanci. Pa nanku ndi. . .

Kadi tudi bapicile mu—mu cikondo cilenga cya dikema, cilenga cya dikema, nenku ndi ne kusakidila kwàbúngi. Tudi . . .

⁸ Mbyenze anu bu bibi's, mûmvwà ndyambidila, bwa kwalukila, kadi kudi cintu cimwepele cinene, nangananga bintu bibidi bìdì bitupangike, mu mushindu wa ne kakwena mukwabo mwaba ùdì mwa kwangata mwaba wabi to. Cintu cimwe, balunda beetu bàdì mwab'ewu aba, ne ekeleeziya. Nansha twètù baye penyi, tudi tukasangana balunda, ne tudi ne kusakidila bwa balunda abu. Kadi kudiku anu cintu kampanda pa bidi bitangila balunda bàtù kacya baashaala anu bakulamate mu mabika ne mala abu, mu mushindu wa ne kakwena mushindu wa kuumusha balunda abu kwaluja bakwabo pa kaaba kaabo to. Mulunda mukwabo nansha yêyè nganyi nansha mufwanyine kwikala wa bishi, kakwena mushindu wa kuumusha mulunda wa nanku awu bwa kwaluja mukwabo pa kaaba kende to. Wêwè ne bôbò nukaadi bashaale bu mukaba ne cilàmbà, nukaadi anu umwe. Nenku twètù, pamwe, bindile Dilwa dya Mukalenge, padi matuku enda aya apa. Nenku mbyenze anu bu ne mbikole bwa kuteeta kwela meeji ne udi mufwanyine. . . Kanwena mwa kutapuluka to.

⁹ Mufundu kampanda nyewu umvwila mu meeji wûndi ngeela meeji ne Pòlò nguwwa muwufunde, ne mwambe mu Kolinto, ne: “Kakwena cintu nansha cimwe cidìku mpindyewu, cintu nansha cimwe cicilwalwà, nansha makole, anyi butaka, nzala, kabutu, anyi cifukiibwa kana cyònsò cidìku mpindyewu, anyi mwoyi, anyi lufu, cidìku mwa kututapulula ne dinanga dya Nzambi didì munda mwa Yesu Kilisto.” Mushindu mwine udibi ne nansha lufu lwine kalwadyakututapululaku to, bwalu tukaadi bamane kwikala baswikakane pamwe mu mwoyi, mu bwobumwe bunene ebu banyungulukile Dìyì dya Nzambi. Nenku nansha lufu lwine kalwakututapululaku to. Netwikale anu kacya twaswikakana mu Cyendeleele cinene, bwa mu bikondo ne bikondo.

¹⁰ Ne dîbà adi bânà. . . Mu dinda kampanda, tudi bafwanyine kuya mu ekeleeziya, mu bushuwa bwa bwalu. Kadi mwaba wònsò unuyaaya, kakwenaku. . . Kî nkaatabernacle kakese kadi mu disangu aku to. Kadi kudi cintu kampanda pa bwalu bwaku kòkò aku, ndi—ndi mpanga kuumvwa kangonga kakese kaa kale aku ne ndi. . . kadila lwà muulu mu mùsongà mwamwa, mu dinda. Ne ndi ngeela meeji ne kakeena kadila mpidyewu to, bwalu kî mbanji kujaalamija kaleyi aku bîmpè menemene to, bwa kangonga aku.

¹¹ Kadi bwa kusangila mwaba ewu mu masangu a mùsèèsù wa Mwandakukulu ne wa Penn Street, mûmvwà kukaadi bidimu bitwà ku makumi asatu ne bitaanu, mutwe binù mwaba ewu mu cisense cya kale, bwa kwibaka ekeleeziya wanyi wa kumpala, ne mushindu wàkawkàtà Mukalenge Yesu naanyi mudimu pa bidi bitangila cyôci aci. Kadi leelu ewu mmwimane bu mwaba mukese munsantu wa dilwa kubandila kaaba aka. Ne

madyoto ne bitoci, s’mmwimane bu mwaba munsantu wa dilwa kubandila. Kadi munda mwa mwoyi wanyi mwamwa, mmwaba munsantu wa dilwa kubandila wikalà mwa kushaala cikondo cyònsò cìndi ne civulukilu. Cidi. . .

¹² Nenku cidi cyenza ekeleeziya kî ncitanda to, mbantu badi badisangishamu bwa kukuukwila Nzambi. Tudi ne kusakidila bwa maalu aa.

¹³ Nenku mpindyewu mvwa ngeela meeji ne, pàmwāpa bu muvwabi ne cikondo cyetu cikaavwa cijike, cyamba kujika, ne—ne kakuciyi kutushaale kabidi dibà dyábúngì to, ndiku anu mufwanyine kunulondela mu cikòsò ndambu wa maalu adi menzeke. Ne pashiise nêngìikalè mwa kwenza ndambu wa mikaba ya mèyi pàncìdi mwaba ewu apa, bwalu ntu munulaye nwènú bònsò, nwamonu’s, ne diyiisha dipyadiya kana dyònsò, diyiisha dya pa mukaba wa mèyi, nediikale dyambedi mwa kukwaciibwa ku cyambilu eci. Apa mpadi mikaba ya mèyi yònsò yikwaciibwa, kî mpambelu pàapa to. Mpindyewu, Mwaneetu Jim ne bakwabo abu batu baya benda bàsùmbisha mikaba ya mèyi mu disangisha, ne bikwabo, kadi cidi misangu yònsò anu pa cintu kampanda cya cifumina kaaba aka dyambedi. Nwamonu anyi? Nukenketaayi myaba yònsò, nenucisangane. Awu mmulayi wanyi kunudi, ne nebitungunuke mushindu awu too ne pìikalà Mukalenge Nzambi mwa kubishintulula.

¹⁴ Nenku ndi ngeela meeji mpindyewu ne baakidìyà beetu baa mikaba ya mèyi, bàdì mu nyungulukilu mujima wa buloba abu, Mukenji ùdì ùpàtukilà kaaba aka awu, Ùdì unyunguluka kabulunga-buloba kajima. Nwamonu anyi? Mu bisuku ne meetu ne myaba yònsò mwamwa, Ùyaayamù ku mikaba ya mèyi yìdì mikwaciibwe. Ne kùdì bampangaanu ne bikwabo, mu myakulu yábúngì, yábúngì menemene mudiWu wandamunyiibwa. Pa nanku ndi muswe, pàncìdi kaaba aka apa, bu Mukalenge mwa kwanyisha, nkwateru ndambu wa mikaba ya mèyi mipyamipya. Ne pàmwāpa, pìikalà mpaasata kayi ne cintu kampanda cya cilakuka munda mwa mwoyi wende diloolo edi to, ee, ndi pàmwāpa muswe bwa kukwata mukaba wa mèyi diloolo edi.

¹⁵ Nenku pashiishe nênye ku Arkansas maalaba, ne, anyi mu diibidì’s we, mu diibidì mu dinda, bwa kafilaku dikwacisha mu cibilu cikese kuntwaku mu Bwànà bwetu bwa Buloba bujima bwa beena Kilisto. Ngeela meeji ne. . . Anyi pàmwāpa ndi mucishindumune bibi. Ncintu kampanda bu ne m’Bwànà bwetu bwa Ditunga bwa beena Kilisto. Ncyèna anu mumanye menemene to. Numfwilaayiku luse. Abi’s mbibi, kî mmwòmò anyi? [Mwaneetu wa balume kampanda udi wamba ne: “Bwànà bwetu Busanga bwa beena Kilisto.”—Muf.] Twasakidila’s, mukalenge. Bwànà bwetu Busanga bwa beena Kilisto. Nenku mvwa ne cya kushaala too ne kundekeelu, kubangila ku dyalumingu dya mpindyewu edi, kuya too ne kundekeelu. Kadi mvwa mulame dituku dya leelu ewu edi bwa tabernacle, bwa

kwikala kaaba aka. Nenukushishe—shishe nempatukè mu diitanu...Adi ki dyodi anyi, mukalenge, didi...Mu diitanu ki mwajika ma—masangisha kuntwaku. Nenukushishe nenditacishè bwa kwalukila mu diisambombo diloolo, bwa kwikala apa mu dyalumingu mu dinda, bu Mukalenge mwa kwanyisha. Nenkwatè mukaba mukwabo wa mèyi. Ne pàmwàpa mîngà misangu, kubangila ku mpindyewu, ndi muswe kukwataku ndambu wa mikaba ya mèyi kumpala kwa twètù kuya.

¹⁶ Ne shishe ncyà bushuwa ne ndi ndwijakaja bwa kuya ku Baton Rouge, mu Louisiane, ku cibilu aci. Ne shishe—ne shishe kwalukila. Ne shishe ndi ne cya kuya, nànsha bishi, ku Anchorage. Nwamonu anyi? Nenukushishe—nenukushishe ku Fairbanks ne ku Anchorage, bwa Beena Kilisto baa Kantu—ku—byanza baa Evanjeeliyo mu Kaabujima, mu mápà awu. Ne shishe kwalukila. Nenukushishe bu Mukalenge mwa kwanyisha, kuya ku Chicago mu lumingu lwa ndekeelu lwa ngondo wa mwandamutekete.

¹⁷ Nenukushishe ndi ncinka dîbà adi ne, patwamba kufika mu ciine cikondo aci, nebikengele bwa mèmè kulwijakaja bwa kwaluja bânà ku Arizona bwa kwikalabo mu...bwa kubaalujà mu tulaasa kuntwaku. Bwalu, Charlie, bikengela ngiikale apa lwa ku matuku dikumi ne ataanu a ngondo wa mwandamukulu. Pa nanku ndi—ndi muswe ngiikale mwalukile patwamba kufika ku ciine cikondo aci, bu Mukalenge mwa kwanyisha, ku Kentucky. Bantu bônso nyawu bätüdiki mu tuseku's, pàmwàpa bamwe baa ku beenyi kî mbamanye ne civwa cyumvwija cinyi to. Ne ndi anu ntekemenaku ne kaciyena cyumvwika cibi ku cyambilu eku to, kadi apu mpikalà muvù wa nshindi mwa kubanga. Pa nanku, Mama Cox, ndi mweyemene aci, wamonu's, pa nanku bwa mbingu yibidi kuntwaku bwa diikisha dyanyi.

¹⁸ Mpindyewu ndi ngeela meeji ne...Ndi ne cintu kampanda kaaba aka cidi Billy mumfundile, tuntu kampanda tukese tufunda. Ne kamwe kaa ku twôtò nkambe ne: "Papa, Mwaneetu Neville mmuswe kumanya ní udiku mwa kulambula bânà babidi." Cya bushuwa's, s'mbifwanyine kwikala anu bilenga. Nenukushishe, eyowa, tudi ne—mudimu wa dilambula ùdì...Abi's mbipiciibwe ne twètù bawènzè mpindyewu. Nenukushishe ndi ngeela meeji ne netwikale mwa kwangata tusunsa makumi anaayi ne tutaanu tûdi tûlondà atu, anyi cintu kampanda, bwa kulondaku mu cikòsò ndambu wa maalù adi menzeke.

¹⁹ Mpindyewu, bantu bààbúngì ne maekeleeziya, bu mudibi ne pâmvwà...Ewu tabernacle ngwa wakidila bantu bônso. Kacya kàtu mwanji kwikalaku dingumba to, kaciyapu, ne Nzambi ènzèku bwa aci kaciyenzekiku to. Bwalu, tudi baswe bwa ewu mwaba kwikalawu wa katuyi ne mukenji nansha umwe—nansha umwe to pa kuumusha dinanga, katuyi ne twitabaayi to pa kuumusha Kilisto, katuyi ne mukanda wa dilongeshangana naawu to pa kuumusha Bible. Ne dîbà adi, katwena ne bya

buumambala to, tudi mu bwobumwe muntu ne mukwende, bwa bantu bônso, mangumba ônsò. Muntu yônso mmwàkidila bilenga ne tudi ne—ne tudi ne bwobumwe banyungulukile Dìyì dya Nzambi, mwaba ùdi muntu ne muntu mwa kudyumvwaku ne mwende mwônso ne mmwàkidila bilenga. Ne dìyì dikulu, tudi anu banange Mukalenge Yesu. Ne—ne twètù biine katwenaku kasumbu kaa—kaa beena mamanya matwe kaaba aka to. Tudi anu bantu baa bapwekele aba badi bateeta anu bwa kubala Bible katuyi twelaMu dyumvwija nansha dimwe to pa kuumusha anu cidiYe wamba aci. Anu. . .

²⁰ Mémè ndi ngiitabuuja ne Nzambi nealumbulwishe baa pa buloba dîngà dituku ku Bible. Mpindyewu piikalabo. . . Yèyè neikale mwa kulumbulwisha baa pa buloba. Kadi kwôkò kakuyi cipiminu kampanda bwa kulumbulwishilaku to, bantu nebamanye cya dyanza bishi? Nwamonu anyi? Mbifwanyine kwenzeka ne Nzambi. . . Kwèna mwa kwela Nzambi kansungansunga pa—pambidi to. Ne bidi bikengela bwa Nzambi ikaleku ne cintu kampanda bu cipiminu Cyende, cidiYe ulumbulwishilaku bantu. Ki bwa cinyi Yèyè mubalumbulwishile ku ekeleeziya wa Katolike kaa cyena Loomo, dîbà adi's ekeleeziya wa cyena Ngelika, Katolike kaa Orthodexe, ne yàbûngì ayi, s'mmijimine cya bushuwa, ne baa pa buloba bakwabo bônso abu. Yèyè mubalumbulwishile ku ekeleeziya wa Katolike kaa Orthodexe kaa cyena Ngelika, kacyi ku ekeleeziya wa cyena Loomo to, dîbà adi's mukwabo awu. . . Dîbà adi's ekeleeziya wa cyena Loomo ne mikwabo yônso ayi's mmijimine. Yèyè mubalumbulwishile ku ekeleeziya wa ba-Luthériens, dîbà adi's ba-Presbytériens bwabo mbutuuke. Bu Yèyè mwa kubalumbulwishila ku ba-Presbytériens, ba-Luthériens ne ba-Baptistes's bwabo mbutuuke. Nwamonu anyi? Pa nanku bu Yèyè mwa kubalumbulwishila ku beena Mpenta, dîbà adi's bônso pa kuumusha beena Mpenta bwabo mbutuuke.

²¹ Kadi Yèyè kaakubalumbulwishila ku ekeleeziya kampanda to, bwa ku wanyi mmwenenu, bwalu nyawu kudi mashiilangana bûngì cyanaana ne cibwejakaji cipitepite bûngì. Kadi Yèyè neabalumbulwishe, Bible udi wamba ne: “Nealumbulwishile baa pa buloba ku Yesu Kilisto.” Mpindyewu, aci's ncyu mu Mifundu. Mpindyewu. . . Ne Bible mmwambe, ne: “Ku cibangidilu kwakadi Dìyì, ne Dìyì dyakadi ne Nzambi, ne Dìyì dyakadi Nzambi. Ne Dìyì dyakavwijibwa mubidi ne dyàkasômbela munkaci mwetu.” “Umwèumwè awu makeelela, leelu, too ne kashidi.” Pa nanku, Yèyè udi Dìyì, ne *Eci* n'Kilisto mu mmwenekelu wa maleeta. Nenku mu Mukanda wa Bwakabuulwibwa kudi beena Katolike, Dibuuululula kudi beena Mishònyì, mu nshapita wa 22 pààkajikà Mukanda ewu, Yesu mmwambe, Yèyè mwine ne: “Muntu nansha bamwamba ne nganyi yèyè anu mudidinge muumushile Dìyì dimwe ku Mukanda ewu, anyi muKusakidile dîyì dimwe, cintu

cimwecimwe aci, cyende citupa, necyumushiibwe ku Mukanda wa Mwoyi.” Pa nanku ndi. . . Kabingila kàdì kènza ne twikalè biitabuuje cyôci eci, ne tushaala anu menemene, cintu nansha cimwe. . . Yèyè udi mwa kwenza bintu bidiYe kayi mufunde apa to, bwa aci tudi bamanye. Kadi patudi tushaala anu ne bidiYe mufumde, aci’s neciikale cilenga.

²² Nanku mpindyewu mu dilambula dya bânà, bantu bààbûngì, ba-Méthodistes batu babamyamina mâyi. Ne—ne ndi ngeela meeji ne batu bangata koomunyo wabo wa kumpala mu ekeleeziya wa Katolike, anyi wa ba-Luthériens, padibo bapeta bidimu bitwe ku dikumi ne bibidi, ne batismo wa—wa mushindu kampana padibo balediibwa. Ndi—ndi ngeela meeji ne bânà baa mu maboko batu babamyamina mâyi. Ne—ne ndi ngeela meeji ne aci ncyàkatàpululà ba-Nazaréens ne ba-Méthodistes, kukaadi bidimu byàbûngì, mu dibatiiza dya bânà bakese. Ngeela meeji ne ncyà bushuwa, Mwaneetu Brown. Ndi—ndi—ndi ngeela meeji ne cyôci aci ncyàkatàpululà ekeleeziya wa ba-Méthodistes ne wa ba-Nazaréens, bwalu ba-Nazaréens bôbò kabavwa biitaba dibatiiza dya bânà bakese to. Kadi bwetu twètù, ku tabernacle eku, patwikala mwa kushaala ne cidi Bible mwambe, kakwena mwaba nansha umwe mu Bible ukaadibo kwôkò bamyamine muntu kampana mâyi, bwa mwânà wa mu diboko kaayi katwambi to, nansha mene muntu mukole to. Kadi bôbò. . . Bible udi wamba, mwaba umwepele wa wetu Bible bwa bânà bakese: “Baakalwa ne bânà bakese kudi Yesu, nanku Yèyè. . . bwa kubatentekelaYe byanza ne kubabeneshaYe.” Ki kwambaYe ne: “Lekelaayi bânà bakese balwe kûNdi, kanubakandi to, bwalu Bukalenge bwa mu Dyulu mbwa badi bu baa nanku.”

²³ Mpindyewu, ki bwa cinyi, tudi bamanye ne twètù tudi byanza bya kabiyi cintu to, mèmè ne mpaasata, anyi mpaasata mukwabo kana yônsò ewu, bwa kwangata byanza bya Mukalenge Yesu. Nanku bu ne Yèyè uvwa kaaba aka mu dinda emu, nanku kudi Kilisto’s nkuvwa baledi aba mwa kwikala balwe ne mwânà awu. Kadi bu mudibi ne twètù tudi kaaba aka bu baleeji baa mpala Wende, bwa ne tudi tuleeja mpala Wende, ki padibo balwa ne bânà kutudi. Nanku tudi tubalambula kudi Mukalenge, pa kubatentekela byanza, bu civulukilu cya Dîyi Dyende dinene ne cyenzi Cyende. Pa nanku mushindu awu ngutudi tulambula bânà bakese.

²⁴ Mèmè pàmwăpa mvwa ngeela meeji ne maamù kampana mmufwanyine kwikala apa ne mwanende utu kayiku mwanji kulambudiibwa kudi Mukalenge to, bwa walwaku pamwe ne baamaamù ne baataatù badi baswe bwa kulambulabo bânà baabo aba. Tudi anu tulwa naabo apa cyanaana bwa kubaleeja kudi Nzambi, ne kubasambidila, ne kwambila Mukalenge ne tudi tubatentekela byanza, ne—ne ciikàle mushindu wa dyangata dya kaaba kaa Byende Yèyè. Nanku aci ncidiku ciibwipi ne Mifundu bwa cinkaadiku paanyi mupete too ne

leelu. Mpindyewu, udi mufwanyine kupatula mukanda webe wa dilongeshangana naawu awu usanganamu cintu kampana civwa kasumbu kampana kaa bantu kambe, kadi mêmè ndi muswe kwamba cidì Dìyì dyambe, nudi numona's. Mpindyewu ndi ngeela meeji ne ngàcìvwiji citooke tòò, bwa cidìci.

²⁵ Mpindyewu mwimbi wa piano (Wêwè ki mwimbi wa piano anyi, mwaneetu wa balume?) bu yêyè mwa kulwaku kuneeku. Aci kí mbibi anyi, mu ekeleeziya wanyi mêmè mwine, nkonka ne: "Mwimbi wa piano nganyi?" Mbyenze anu bu ne bidi bikengela bwa nkookole ku ciibi's. Eyo. Badi bimba kaamusambu kakese aka, anyi bakimba ku cisanji.

Lwâyi naabo muneemu, lwâyi naabo
muneemu,
Lwâyi ne bânà bakese kudi Yesu.

²⁶ Nenku padi disangisha munkaci mwa kwimba cyôci eci apu, tujuukilaayi kuulu. Nenku baamaamù ne baataatù bàdì balwa ne bânà baabo bakese abu, balwe mpindyewu biimane. Eyo.

Lwâyi naabo muneemu, lwâyi naabo
muneemu,
Lwâyi ne bânà bakese kudi Yesu.

Mpindyewu, mpaasata . . . Mpindyewu nyewu tudi ne mwânà mukese—mukese kaaba aka mulaale tulu. Ne misangu mikwabo bôbò batu bamba "amen" ne dîyì dikole ndambu, nanku tudi tuumvwa ne, bôbò mbânà baa mu maboko. Dyebe nganyi, mukalenge? William Henry Vincent. Kadi mwaneebe wa bakaji mutekete ewu? Christina Maria Vincent. Mwânà mutekete kaayi mulenga mulaadile pa dikaaya dya—dya tatwëndè's we. Ndi mwa kumwambulaku anyi? Christina, mêmè ncyèna mwa kwangata kaaba kaa tatwèbè ewu to, wamonu's. Twanji anu . . . Swaku utentekela mwânà ewu byanza.

Twinyikaayi mitu yetu.

Taatù wetu wa mu Dyulu, nyewu tuseemena pabwîpì ne Nkwasa Webe wa butumbi, bwa ne leelu ewu, muulu amu, diitabuuja dyetu didi ditutuntumuna dipita diya neetu too ne dyamwamwa dya ngondo, dya mitooto, dyamwamwa dya ndongolwelu wa lwendu lwa dîbà mu cibwashibwashi, dikabwela mu Bwikadi bwa wa Bukole bwônsò awu. Tudi tulwa ne mwânà mukese mulenga kwîsù ewu. Katwena bamanye ne citudi bambule mu maboko etu ciine eci ncinganyi to, Mukalenge. Ncifwanyine kwikala musadidi munene bwebè Wêwè, wa mu matuku acilwalwà. Tudi ne dyeyemena dya ne mmwômò. Kadi tatwëndè wa mwânà ewu nyewu mulwe ne mwânà mukese ewu kutudi, bwa twètù kumutentekela byanza. Bu mutudi twètù, tudi bajikule ne tudi basadidi Beebe bwa kwenza cyenzi eci pa kaaba Keebe too ne pa Wapingana, dîbà adi Wêwè údyàngàcìlè bintu byònsò. Patwamba kufika kwine

aku, Mukalenge, tudi ne cyà kuKukwacile mudimu ne bulelela ne meeji matooke.

Nenku ne byanza byetu bitentekela mwânà wa bakaji mutekete ewu, tudi tumubenesha mu Dîna dya Mukalenge Yesu Kilisto. Tudi ne dyeyemena dya ne Wêwè neumupe matuku àbûngi a kwikala ne mwoyi, bu Yesu mwa kunenga, nenku swaku bwa kwikalaye musadidi munene bwebè Wêwè. Beneshaku dikù diikalaye mwa kukoleshiibwamu. Swaku bwa kukoleshiibwaye mu mibelu ya Nzambi, ne aMukwacile mudimu matuku ende ònsò a mwoyi. Beneshaku baledi bende, ne swaku bwa biikalèku ne mwoyi too ne ku dimona dya mwânà ewu mwikàle lupanza lwa kunemekiibwa bwa Mukalenge, bwa cyenzi cyabo cya leelu ewu eci, mu Dîna dya Yesu Kilisto. Amen.

Nzambi akubeneshe.

Nzambi akubeneshe, mukalenge. Dîna dya mwânà wa bakaji ewu didi. . . [Mwaneetu wa bakaji kampana udi wakula ne Mwaneetu Branham—Muf.] Ewu m’Mwaneetu wa bakaji Tabet, Teresa. Ncyêna anu mumanye ni twakumbana mwa kwambula Teresa, anyi ní katwakukumbana. Ncyêna ngeela meeji ne nebikumbane to. Yêyè mmumanye bipiteku ndambu.

Ee, twinyikaayi mitu yetu.

Taatù wetu wa mu Dyulu, patudi batentekele mwanaabo wa bakaji wa mwânà mukese utwâfumu ku dilambula Kûdì ewu ewu, baledi mbaswe bwa mwânà mutekete ewu alambudiibwe pende. Swaku bwa ngàsà wa Mukalenge Yesu Kilisto ikale pambidi paa mwânà ewu, ne amupe matuku àbûngi a kwikala ne mwoyi, nsòmelu wa mudimu mubeneshiibwe Bwebè Wêwè, mu Dîna dya Yesu Kilisto. Amen.

Nzambi akubeneshe, munanga wanyi, anubeneshe bônso. Nudi baledi baa dyakalenga dyàbûngi mu dinda emu, bwa kwikala ne bânà babidi batekete balenga kwîsù abu.

Dîna dyende? [Taatù udi wamba ne: “Joe William Cartwright.”—Muf.] Joe William Cartwright. Udi munkaci mwa kwangata kalu kende kaa mundaamuunya mu dinda emu’s, mûndi ngeela meeji. Eyo. Mpindyewu, bu ne nwênù—nwênù bônso. . . Ee, wêwè udi mwa kumwambula pawikala—pawikala muswe’s, mandamu. Aci’s ncimpè. Joseph, lwâku kuneeku. Eyo. Nenku udi wêwè mwa kumwambula pawikala muswe.

Taatù wetu wa mu Dyulu, nyewu tulwa Kûdì, ne Joseph William Cartwright mwânà ewu. Taatù nyewu mwimane, mu dinda emu, bwa kuKwalujila cyûvwà Wêwè mumupe aci, bwa nsòmbelu wa mudimu. Nzambi, beneshaku mwânà mukese ewu, ne swaku bwa alaale abooboke, mwikàle ne mubidi tumatuma, ne dikanda, ne alwe musadidi munene bwebè Wêwè. Beneshaku tatwëndè ne mamwëndè, dikù diikalaye mwa kukoleshiibwamu adi. Swaku bwa Kilisto ikale Mwenyi udi kayi umweneka awu mu bikondo byònsò. Nenku nyewu tuKupeesha mwânà mukese

wa balume ewu, bwa nsòmbelu wa mudimu, mu Dîna dya Yesu Kilisto. Amen.

Akubeneshe, Mwaneetu Steve Cartwright.

Mwânà mukese wa bakaji? [Mwaneetu wa bakaji awu udi wamba ne: “Eyowa’s, mukalenge.”—Muf.] Dîna nganyi? [“Sylvia Shippy.”] Sylvia Shippy.

Taatù wetu wa mu Dyulu, nyewu tudi batenteketele mwânà mukese wa bakaji ewu byanza, bu mudi munanga wetu ewu ulwa nende kaaba aka mu dinda emu, mwimane ku cyoshelu. Swaku bwa mabenasha àvwà mafwanyine kulwa pambidi pende awu, bu ne Mukalenge Yesu nguvwa mutenteketele mwânà ewu byanza Byende Yèyè mwine bya bibangu bya mputa ya misonso abi, swaku bwa mabenasha awu ikale pambidi paa mwânà ewu. Mubeneshaku mpindyewu, nenku swaku bwa alaale aboobokeye, ne nsòmbelu wa dyakalengele, ne ikale musadidi bwebwe Wèwè. Ne beneshaku dikù dyende, baledi bende, bananga bende. Mu Dîna dya Yesu Kilisto mmutudi twenza cyenzi eci, bilondeshile Bible. Amen.

Nkukubenesha...?...Akubeneshe...?...

Nwamonu’s, mwânà wa balume ewu neikale kangimba. Dyende nganyi? [Mwaneetu wa balume udi wamba ne: “Lori Ellen Myer.”—Muf.] Lori Ellen Myer. Ngámò ne: “Mwânà wa balume ewu neikale kangimba.”

Cidi cimvulwija’s. Ndi ntekemena ne eci kaciyena cyumvuwika cibi to, mu ekeleeziya, kadi dituku dikwabo mwana ngaakula ne Indien kampanda. Úvwa ne mwânà mukese mwimane mwaba awu, ki mêmè kwamba díbà adi ne: “Mmwânà wa balume wa maalu mîmpè. Ne yèyè mmwânà wa balume wa maalu mîmpè.”

Ki sheefu awu kushaalaye muntangile, munda mwa ndambu wa tusunsa. Pashiishe kutangilaye panshi, kwambaye ne: “Kadi’s, yèyè kî ngwa balume to, s’ngwa bakaji.”

Ngeela meeji ne, mushindu awu ngucidibi byamba kwikala’s.

Mwânà...Dya mwânà wa bakaji ewu nganyi? [Mwaneetu wa balume awu udi wamba ne: “Lori Ellen.”—Muf.] Lori Ellen. Ellen ki dîna dyebe dya famiye anyi? [“Myer.”] Myer. [“Lori Ellen Myer.”] Lori Ellen Myer. Yèyè’s ncyânà cya bakaji cikese cilenga cya kacya.

Taatù wetu wa mu Dyulu, patudi batenteketele mwânà mukese ewu byanza apa, ne mu Bible mbambe baakalwa ne bânà bakese Kùdì, ne Wèwè kubatentekela byanza ne kubabenesha. Nenku aci ki cyenzi citudi twenza mu civulukilu cya Cyebe cyenzi cinene cya pa buloba aci. Beneshaku mwânà ewu, baledi bende. Dikù dyabo diikalè mwaba wa masambila mamonangane díbà dyònsò, ne diitabuja. Ne swaku bwa mwânà wa bakaji ewu alaale aboobokeye, ne nsòmbelu wa dyakalengele ne ikale

musadidi Webe mu miine matuku ônsò awu. Ne swaku bwa mu dikù edi kamupangikikù nansha umwe to. Mu Butumbi, swaku bwa baasangila bônso cidimba ne cidimba banyungulukile Nkwasa munene wa butumbi wa Nzambi, mu Dituku adi, dyayabo bwa kushaala ne mwoyi kashidi adi. Patwamba kufikila kwine aku, Mukalenge, swaku bwa mabenesha Ebe a Cyendelele awu ikale pambidi paa mwânà ewu, utudi tubenesha mu Dînà dya Yesu ewu. Amen.

[Mwaneetu kampana wa bakaji udi wamba ne: “Mwanaabo wa bakaji nyêyè ewu...?...”—Muf.] Akubeneshe, mwaneetu wa balume. Mwânà mukese ewu...[“Dyende n’Rebekah.”] Mmwakunyende wa bakaji’s, Rebekah.

Taatù wa mu Dyulu, nyewu tudi batentekela Rebekah mwânà ewu byanza ne tumubenesha, yêyè pende, mu Dînà dya Mukalenge Yesu, byenze anu bu ne yêyè uyaaya mutangile ku mâyi, ku ciina cya mâyi. Nenku ndi ne dyeyemena, Mukalenge, dya ne, dituku dilwalwa diikalaye ukaadi mutantamane, mu cipimu cya didyambwila dya bujitu, diikalaye mwa kudyangacila dyende dipangadika, ne kudiyiila tamakatamaka too ne ku ciina cya mâyi kwaka, ne kubatijiibwaye bwa dilekelediibwa dya mpekaatu yende, mu Dînà dya Mukalenge Yesu. Enzaku nanku, Taatù. Mpindyewu mubênêshâku, pamwe ne mwakunyende wa bakaji. Swaku bwa walaala wabooboka, ne nsòmbelu wa dyakalengele, ne waKusadila. Amen.

Amubeneshe. Mukalenge anubeneshe.

Nyêyè ewu? [Maamù udi wamba ne: “Ewu n’Jacqueline Grenault.”—Muf.] Jacqueline Grenault mwânà, mukwabo mwânà wa bakaji mutekete, mulenga kwîsù.

Taatù wetu wa mu Dyulu, nyewu tutentekela mwânà mukese wa bakaji ewu byanza. Mu civulukilu cya Mukalenge munene Yesu, Yêyè wâkatentekela bâna bakese byanza ne kubabenesha awu. Nenku swaku bwa dibenesha dilwe pambidi paa mwânà ewu, byenze bu ne byanza Byebe Wêwè mwine mbidi bimumentekela ebi, leelu ewu. Bu ne Wêwè uvwa usanganyiibwa pa buloba apa, mu mubidi wa musunya, Kûdî Wêwè nkuvwa maamù ewu mwa kulwa ne mwânà ewu. Kadi bu mudibi ne twêtù, bu muleji wa mpala Webe, yêyè udi ulwa kudi wa mulondele, dîbà adi, Taatù. Nenku tudi tulomba bwa Wêwè kubeneshaku mwânà ewu, utudi twêtù tubenesha ewu. Mu Dînà dya Yesu Kilisto, swaku bwa yêyè alaale abooboke, ne nsòmbelu wa dyakalengele mu mudimu Webe. Beneshaku dikù dyende diikalaye mwa kukoleshiibwamu adi, swaku diikalè nzubu wa masambila mamonangane, mu Dînà dya Yesu. Amen. Akubeneshe.

Wêwè udi naabo babidi? [Mwaneetu wa bakaji awu udi wamba ne: “Ndi ne bâna baa bakaji babidi, ncitu mwanji kulwa naabo bwa kubalambula to...?...”—Muf.] Eyo.

Mpindyewu, mwânà mukese wa balume ewu udi... ["James David."] James David. ["Humes."] Humes. Mvwa ndyambidila ne ntu mukumanye's, Mwaneetu wa bakaji Humes. Wêwè ewu's utu missionnaire, ne wêwè ne bayeebe. Bayeebe awu nudi nende, mu dinda emu anyi? Ee, Mukalenge abenesheku Mwaneetu wa balume Humes. Twâmbè ne, ncyà bushuwa ne, nudi ne bânà bakese baa maalu mîmpè. Ewu ki David anyi? Nenku ewu ki... ["James David. Ewu n'Joseph Benjamin. Patuvwa mu Floride...?..."] Mvwa nyiikilangana anu cyanaana ne mwaneetu wa bakaji wa ku Floride ewu, mu bîrô, mu dinda emu. Mwânà mukese wa balume ewu, pacivwaye... Bôbò mbaa ku Floride, pacivwabo kuntwaku, mwânà mukese wa balume ewu, mucikàle anu kambodyoto's, kânà kakesèè, kaamuntu kanciin, kubwelelaye lwà mu bulà bwa kumfundu aku, wenda utangila muulu. Kwambaye muvwaye mumone Yesu.

Mpindyewu, bwa David Humes mwânà ewu. Nyewu tudi tumutentekela byanza, bu dilambula dya nsòmbelu wa mudimu bwa Yesu Kilisto. Tungunukaku ne mabeneshà Ebe pa dikù dyende, Mukalenge. Ne uvwijeku tatwèndè ne mamwèndè, Mukalenge, ne makanda ne mubidi tumatuma, bwa bôbò kutungunuka ne mudimu wûdi Wêwè mubabiikidile bwa kwenza bu ba-missionnaires mu budimi bwa bwambi. Ne mpindyewu swaku bwa David mwânà ewu alaale abooble, ne nsòmbelu wa dyakalengele wa mudimu bwa Yesu Kilisto. Tudi tulomba nunku, mu Dîna dya Yesu. Amen.

Nenku bwa mwakunyende wa balume ewu, Joseph, Éyì Nzambi, pacivwaye anu kambodyoto ne mwikàle utangila mu maulu ne kumonaye mmwenekele wa Mukalenge Yesu. Swaku bwa mabeneshà a Nzambi alwe pambidi paa mwânà mukese wa balume ewu utudi tulambula bwa mudimu wa Yesu Kilisto, mu dinda emu. Nenku swaku bwa Nyuma Mwîmpè Webe munene awu alombole mwânà ewu, Mukalenge. Pâmwâpa mwaba kampana mu nsòmbelu wende, bu maalaba mwa kwikalaku, Wêwè... Yèyè neatungunuke ne Evanjeeliyo utudi twètù tuteeta ne bukito bwònsò—bwònsò bwa kutwa nyama ku mikolo leelu ewu. Mubènèshàku, Taatù, yèyè utudi twètù tubenesha mu Dîna Dyebe ewu. Amen.

Akubeneshe. Nzambi akubeneshe. [Mwânà awu udi wamba ne: "Mwinshi mwa mucu awu mmûmwà mumone Yesu."—Muf.] Yesu mwimane mwinshi mwa mucu awu, civwaye...?...

Ee, s'бивва bikengela mêmè kwikala mumanye nsongaalume ewu. [Mwaneetu wa balume kampana udi wamba ne: "Stanley."—Muf.] Eyowa's, mukalenge. Wetwawu! Kadi, ncyèna mwa kuvuluka dîna dyende to. Danny Eugene Spaulding. Ee, ndi ntekemena ne neulonde papa mu dikàsà, bu mudibi ne wêwè uciidi anu mwânà mutekete. Mwânà mukese wa balume ewu, bantu aba batu balwa ku tabernacle eku, dîbà dyònsò. Nenku musangu wa kumpala wûndi mumumone

kacya pacivwaye . . . Ngeela meeji ne, mmusangu wa kumpala wûmvwâku mumumone. [Mwaneetu wa balume awu udi wamba ne: “Bwa ku dyanyi paanyi dimanya.”] Eyowa’s, mmusangu wa kumpala wûndiku mumumone.

Taatù wa mu Dyulu, nyewu tulwa Kûdì mu dinda emu ne mwânà mukese wa mu diboko ewu udi mufidiibwe mu bukubi bwa dîkù dya beena Kilisto edi ku bundeji bwa taatù ne maamù beena Kilisto aba. Tudi ne kusakidila pa kumona bânà bakese balediibwa mu dîkù bu nunku, Mukalenge, bwalu tudi twitabuuja ne nebakoleshiibwe mu mibelu ya Nzambi. Nyewu mmutentekela byanza, pamwe ne mpaasata, mu Dînà dya Yesu Kilisto. Swaku bwa mwânà ewu ikale ne mwoyi ne makanda ne mubidi tumatuma ne ikale musadidi Webe matuku ende ônsò a mwoyi. Tudi tulomba nunku, mu Dînà dya Yesu Kilisto. Amen.

Mukalenge akubeneshe, Stanley. [Mwaneetu wa bakaji Spaulding udi wakula ne Mwaneetu Branham—Muf.] Kuvwa nku disambila kabidi kwakafikaye. Abi’s mbilenga be.

Yèyè . . . Robert Douglas Samples. Mukwabo mwânà mukese wa balume mulenga wa mèsù a bleu.

Taatù wa mu Dyulu, nyewu tulwa Kûdì ne mwânà mukese wa balume wa mèsù a bleu ewu mu dinda emu padiye mwimane pa cyoshelu padi misuuka milediibwe cyakabidi munda mwa bidimu makumi asatu bishaale ebi eci. Swaku umwakidileku, Mukalenge, mu dinda emu, patudi tumutentekela byanza ne tumulambula ku Bukalenge bwa Nzambi ne ku mudimu ne ku—ku nsòmbelu wa mubidi tumatuma ne makanda apa. Mu Dînà dya Yesu Kilisto mmutudi twenza nunku emu. Amen.

Akubeneshe, wêwè mwânà mukese.

Wakupeeshi . . . Mêmè—mêmè ncivwa mumanye, Jimmy, ne uvwa mwimane mwaba awu ngwêwè to. Ekelekele, paabo benze mu . . . Kaafamiye keebe’s kakaadi kenda kadyunda. Bilenga bya dikema. Mpindyewu, dyende . . . Shawn Patrick Poole. Kakwëndè mulume wa mwânà wa balume ewu ne mêmè tutu balunda baa kacya kwônsò aku, kacya anu patucivwa bânà batekete mu kalaasa. Katuvwaku banene kutamba mudiye emu bikole to patwâkapetangà. Twinyikaayi mitu yetu.

Taatù wa mu Dyulu, pâmwăpa kukaadi bidimu bitwe ku makumi anaayi, mwimane mu ciibi cya kalaasa pa Utica Pike apa, ncivwaku mwa kumanya ne mwânà wa balume mukese awu, twêtù, biikàle ne bundu, tutangilangana ewu ne ewu, ne dîngà dituku ngaadyâkutentekelakù mwikulwende byanza, mwikàle mmulambula kudi Mukalenge Nzambi wa mu Dyulu. Akidilâku Shawn mwânà ewu, mu dinda emu, Mukalenge, bu musadidi Webe. Maamù ne taatù nyewu balwe nende ne dikima dyônsò, bwa kwalujila Nzambi civwaYe mubape bwa kucikubabo. Swaku bwa kwikalabo bakolakane ne nsòmbelu wa mubidi tumatuma ne wa makanda, ne dikanga dya mwoyi,

mu Kilisto. Mpindyewu nyewu tuKupeesha mwânà mukese wa balume ewu, mu Dîna dya Yesu Kilisto, bu nsòmbelu wa mudimu. Swaku bwa alaale abooboکه, ne aKusadile.

Mwânà mukese wa bakaji ewu bakaadi bamulambule anyi? Dyende nganyi? Karla.

Bya mwomumwe kabidi, Karla mwânà ewu, nyewu tumutentekela byanza, mu dinda emu, ne tumulambula ku mudimu wa Yesu Kilisto. Nzambi, mubenesheku. Swaku bwa alaale abooboکه, ne nsòmbelu wa dyakalengele. Swaku bwa ikale musadidi Webe, matuku ònsò a mwoyi ewu. Enzaku nanku, Mukalenge. Beneshaku dîkù dyabo. Enzaku bwa kwikaladi misangu yònsò anu mwaba wa masambila ne diitabuuja. Nyewu tuKupeesha mwânà mukese wa bakaji mulenga kwîsù ewu, mu dinda emu, kuumukila ku mwoyi wa taatù ne wa maamù badi biimane ku cyoshelu eci aba, mu Dîna dya Yesu Kilisto. Amen.

[Taatu udi wamba ne: “Dyende n’James Poole.”—Muf.] Mwânà mukese wa balume. Mbamwinyike Jim. [“Eyowa.”]

Taatù wetu wa mu Dyulu, tatwëndè wa bânà bakese aba nyewu mwambule mu maboko ende cintu cikese cya mushinga cya ndekeelu cyûdi Wêwè mumupe mu mmwenekelu wa mwânà, mumwinyike dîna dya tatwëndè, James. Nzambi, enzaku bwa ikale muntu wa lungenyi bu muvwa Yakobo mu—mu Bible. Ndi ndomba bwa Wêwè kumupa mwoyi wa matuku àbûngi, wa mubidi tumatuma, Mukalenge. Ne swaku bwa akole, ne bu maalaba mwa kwikalaku, ambuleku Diyî dya Nzambi. Enzaku nanku, Taatù. Civulukilu cya cyàkenzà Yesu Kilisto Mukalenge wetu pavwaYe pa buloba, ndi ntentekela James Poole mwânà ewu byanza ne mmulambula ku mudimu wa Nzambi. Mu Dîna dya Yesu Kilisto. Amen.

Akubeneshe, James! Abeneshe mwânà awu!

Mwânà mukese wa balume; babidi mpindyewu. Wamba ne? Jerry Dean Allen.

Mukalenge Nzambi, pa mutu wa mwânà mukese wa balume ewu, Jerry Dean Allen, swaku bwa mabenesha a Yesu Kilisto ikalepu, patudi tumutentekela byanza apa, patudi tuKulambula mwoyi wa bwânà ewu apa, beneshaku dîkù dyabo, baledi bende, ne swaku bwa alaale abooboکه, ne nsòmbelu wa dyakalengele wa mudimu wa Nzambi wetu ne Nzambi wende, kudiYe kutudi tumufila mpindyewu, mu Dîna dya Yesu Kilisto. Amen.

Akubeneshe, wêwè mwânà!

²⁷ Mpindyewu, ngeela meeji ne aci cyënjiku bu—cyënjiku bu cyamanyi bwalu abu mpindyewu. Mpindyewu tudi menemene anu pa dîbà, dîbà dikumi ne dimwe jaajaaja. Mpindyewu, nudi bamanye’s, ndi mêmè anu mwa kudifwanyikijila, kumona baamaamù abu benda balwa, pamwe ne baataatù, ne biine bânà

abu apu, ndi mufwanyine kutuma meeji kudi Yozefu ne Mariya, dinda dya dilambula dya Mukalenge Yesu adi.

²⁸ Mwaneetu Kidd, mvwa ne muyiiki wa babidi ne muntu kampanda mu birô, kadi mêmè—mêmè kuumvwa disaluka dyebe mu dinda emu kaaba aka, dya—dya muntu wa bukole bwebe abu. Ne ndi ncinka ne uvwa munkaci mwa kulonda mudi Mukalenge mukwondope. . . mu bateeleji amu. Kadi mvwa mwambe kusunsula kashinyi kaanyi, dinda kampanda, bwa kufika kudi mukulumpè. . . Yêyè's mmwambi wa kale.

²⁹ Anji elaayibi peenu meeji, mùvwà muntu ewu, mukajende mukese awu mwaba ewu, ùkaavwa uyiisha Evanjeeliyo kumpala kwa mêmè kulediibwa. Uyiisha Evanjeeliyo ewu, pa mikuna ne mu bibandabanda bya mu Kentucky ne mu Tennessee, ne beena midimu ya mines ya makala, ne biikàle bamwipata. Baa bwalu bavwa basòmba kabayiku ne kantu nansha kakese kaa kudya to. Kadi mukaji mukese ewu, mwikàle usukwilangana bilàmbà pa dibaya, bwa bamufuta tuumeeyà tutwe ku makumi abidi anyi makumi asatu ku dituku, bwa kutumaye bayende mu budimi bwa bwambi bwa kuyiishaye Evanjeeliyo. Aci's ncikumbane bwa kusalula muntu, kî mmwômò anyi?

³⁰ Ne pashiishe pa kwela meeji ne, yêyè awu ngudi mulaale panshi, padi bangangabuka baa bapiluke bambe ne: “Yêyè udi ùpùnga ne lufu. Mpaci wende wa mênÿi, kansere kakaadi mubidi mujima. Yêyè udi mwa kushaala ne mwoyi anu mu ndambu wa mèbà mabala ku minu cyanaana, kadi nangananga dituku dimwe anyi abidi.” Kadi ciine aci ncyenzeke kukaadi bidimu bibidi anyi bisatu, kukaadi bidimu bisatu. Kadi's nyêyè ewu, mu dinda emu, ne mubidi tumatuma, ne bukole bwa mubidi, upa Nzambi butumbi. Dìbà adi ukaavwa ne bidimu bùngì kaayi pauvwa mwondopiibwe apu, Mwaneetu Kidd? Bidimu biipacila ku bìngà pavwa Nzambi. . . Udi ne bidimu bùngì kaayi, bidiye naabi mpindyewu? [Mwaneetu wa bakaji kampanda udi wamba ne: “Makumi mwandamukulu ne bibidi.”—Muf.] Makumi mwandamukulu ne. . . [“Makumi mwandamukulu ne bisatu mu ngondo wa mwandamukulu emu.”] Eyo. Ùvwa ne bidimu biipacila ku makumi mwandamukulu pavwa Nzambi mumwondope apu. Mpindyewu Nzambi udiku utucyuka twètù bantu bakole aba anyi? Cya bushuwa's, Yêyè udi utucyuka. Eyowa's, mukalenge!

³¹ Yêyè wakondopa Abraham pakaavwaye ne bidimu lukama, ne Sarah pakaavwaye ne makumi citeema. Nenku kulelabo Ishamela, anyi, mfwilaayiku luse, Izaka. Ncya bushuwa anyi? Tudi ne disanka dyàbùngì bwa bwalu abu.

³² Mpindyewu nudi bilenga bya kacya, mu mushindu wa mêmè mufwanyine kwakula neenu dinda dijima edi mushindu ewu. Kadi tubalaayiku anu ndambu wa Dìyì dya mushinga mukole edi ne pashiishe tubwele buludi mu mudimu. Mpindyewu, ndi

ngeela meeji ne, cyôci ciikàle diswa dya Nzambi, ndi muswe kunulondelaku mu cikòsò mu mushindu kampanda maalu adi menzeke. Ne pashiishe diloolo edi, bu Mukalenge mwa kwanyisha, ndi muswe kwakula pa cyena-bwalu kampanda—kampanda. Ndi muswe kucikwata pa mukaba wa mêyi, nangananga, bwa kupatukawu. Kudi...Nenku panwikala baswe kulwa bwa kuteeleja, mbîmpè. Paanyima paa mpaasata mumane kujikija ne diyiiisha dyende, pashiishe mêmè nênyiiishè dyanyi... Nênkwatè mukaba wa mêyi ewu. Ndi muswe kuyiisha pa *Mudilu Mukunze Ûdì Ùpòdya Wà Dihwa Dyèndè*. Mushindu mwine udi dimwe dya ku mishindu ya dipodya adi dituvwile twètù mpindyewu mene! Nenku pa cyôci aci mpândi muswe kwakula diloolo edi, mudilu Wende mukunze ùdì ùpòdya awu. Yèyè udi kaaba aka, mwikàle anu pabwîpì menemene mpindyewu mene. Ci—cimanyinu cikaadiku, kawulu kakaadi ku makinku.

³³ Nomba, nshapita wa 16, bwa nwênù badi baswe kubuulula ne kubala. Edi n'Diyi dya Cyendelele, pa nanku tubalaayi ne kaneemu kònsò. Ndi muswe kubala mvensa yibidi ya Nomba 16, mvensa mwi³ ne mwi⁴, bwa kupetaku kaaba kakese kaa kushindamijila bîndi njinga kwamba.

³⁴ Nenku mpindyewu, pîikalà mikaba ya mêyi kayiyi myanji kubanga dikwaciibwa to, ndi njinga bayèndèshè mpindyewu. Anyi bayilongolole mu mushindu wa ne citupa eci cyamona mwa kupatudiibwa. Eci necipatuke. Panwikala baswe, nudiku ne mushindu wa kulongolola mikaba yenu muntwamu bwa ne eci citupa ciikàlè pabwàci ne citupa cikwabo cya disangisha ciikàlè pabwàci anyi? Nudi numona's, eci nci—ncintu cipyacipyu. Mpindyewu pawikala ne mushindu wa kuwimanyikila apa mene, anyi cyònsò cyùdì wenza aci, ee, dîbà adi netwikale mwa... Udi muswe bwa mêmè kuciimanyikaku bwa kasunsukila kaa kasunsa, pashiishe kuciteemesha cyakabidi, bwa cikupeeshe cimanyinu bwa wèwè kumanya mwaba wa kucibangila, anyi udi mwa kubangila mwaba awu nansha nanku? Tubange nansha nanku. Eyo. Abi mbîmpè.

³⁵ Mpindyewu netwikale mwa kubala Nomba 16.3 ne 4.

Ki kudisangishabo bònsò pamwe bwa kukàndameena Mòsà ne kukàndameena Aalona, ne kubambilabo ne: Nwênù nwàlu kudimona peenu be, pa kumona ne disangisha dijima ndya cijila, muntu ne muntu wa kudibo, ne MUKALENGÈ udi munkaci mwabo; bwa cinyi bunudi nwênù mwa kudibandishila kumutu kwa disangisha dya MUKALENGÈ?

Nenku paakumvwa Mòsà bwalu abu, wakapona mpala panshi ne:

³⁶ Taatù wetu wa mu Dyulu, beneshaku Mêyi makeese aa. “Ne swaku bwa dyelangana dya meeji dya mu mwoyi wetu, ne

mamuma a ku mishiku yetu, biikàle biitabuujiibwe kumpala Kwebe.” Mu Dìna dya Yesu mmutudi tulomba amu. Amen.

³⁷ Ndi muswe kwa—kwangata cyena-bwalu eci, bwa bìndi muswe kwamba mu dinda edi ebi ne: *Kwimana Pankaci*.

³⁸ Bwa cikondo cyena bwalu butudi twakwila eci, anyi butudi tubala ebu, mu bushuwa bwa bwalu, tudi bônso tumvwa ne mpavwa Datana ne—ne—ne Koola bangate dipangadika dya—dya ne bavwa bafwanyine kucyamakana mu—mudimu mutuma naawu Mòsà uvwa Nzambi mumupe, bamba ne: “Bivwa bikengela nwênù kulekela disangisha dijima kwenzadi *cikampanda ne cikansanga*. Bônso mbaa cijila.” Paabi Nzambi uvwa mutumine Mòsà diyi bwa kulombola cisamba aci too ne ku buloba bulaya. Kadi bôbò baakamba ne: “Wêwè wadimonu peebe be. Wêwè, udi uteeta kudyangata wêwè mwine bu ne udi nkaayeebe udi—udi ne diyi dya kwamba mu musumbà wa bantu ewu.”

³⁹ Ki bwalu abu kubiipila Nzambi bikole mu mushindu wa ne Yêyè wakambila Mòsà ne: “Tapuluka naabo. Mêmè—Mêmè anu—Mêmè nênshipè anu musumbà mujima awu, ne nêmbangulule lukongo lupyalyupa neebe wêwè.” Ki Mòsà kuponaye mu Bwikadi bwa Nzambi nenku kwambaye ne bivwa bikengela bwa kumusambukaYe yêyè. Nwamonu anyi?

⁴⁰ Mpindyewu, leelu ewu, bu ne bivwa bikengela bwa Nzambi kubutulaye bantu, ne bu ne kuvwaku cikondo civwa Nzambi muumvwe biMutonde bwa kukutakanangana ne mpekaatu wetu, twêtù biikàle anu twenda batungunuke ne kunyanguka ku musangu ne ku musangu, udiku mufwanyine kwimana bu Mòsà nganyi, leelu ewu, bwa cisamba? Nkwèpi kutudiku bafwanyine kupeta muntu udi mufwanyine kwimana, anyi mufwanyine kwikala ne mushindu wa kwimana, udi Nzambi mufwanyineku kwitabila mwakiitabilaYe Mòsà amu? Ne nsòmbelu wa Mòsà yêyè mwine pa buloba uvwa ne mushinga wàbûngì menemene kudi Nzambi mu mushindu wa ne wakiimanyika cijji cikole cya Nzambi, ne Nzambi kayiku mufwanyine kusambuka Mòsà to. Aci bwanyi mêmè civwa misangu yônso anu cintu cikole mwa kucyumvwa too ne pângàavu mêmè. . . Dìngà dituku, mu dibuuludiibwa dya Mufundu awu, kundwilaku meeji aa. A ne, nudi numona’s, Mòsà, mu cyenzedi, uvwa mu mushindu wônso wangata kaaba kaa mukwabo. Yêyè uvwa cimfwanyi cya Yesu Kilisto.

⁴¹ Ne pavwa Nzambi ukeba kuumusha mwoyi wa buloba bujima, ne kububutula, ne bônso bavwa bangenzàmpèkààtù, biikàle bapiishiibwe bwa kufwabo, Kilisto wakatufwila twêtù bônso. Ne Nzambi kavwaku mwa kusambuka Kilisto to, bu muvwaYe Mwan’Ende sungasunga. Ne dîbà adi Yesu wakaDifila patupu, bwa dîbà adi kumonaYe mwa kusebela njila bu ne. . . Mòsà kavwaku mufwanyine kwikala mwenze aci to. Mòsà kavwa

ne mashi to pa kuumusha mashi etu a buntu aa, anu mutudi twètù emu. Pa nanku, ki bwa cinyi, mashi ende yèyè kaàvwakù mafwanyine kwikala . . . kaàvwakù mwa kukumbana to. Kadi bu muvwabi ne Yesu uvwa m'Mashi a Nzambi Yèyè mwine, Mashi mafuki a Nzambi, Nzambi dîbà adi wakafwila anu bukwabantu bwônsò nkòòng luse, ku mpekaatu, bwalu yônsò yakateekiibwa pambidi Pende. Ki kuyaYe ku Kalvariyo ne kufwaYe, pambelu paa Bwikadi bwa Nzambi, ne kukengaYe. Ne Wàkeediibwa mu iferno, bwalu Yèyè uvwa mpekaatu, muvwijiibwe. . . mpekaatu yetu pambidi Pende. Ne kwôkò aku mwikàle mutwambwidi wa—wa bujitu bwetu, wàkangata mpekaatu yetu kuya naayi ku—ku Kalvariyo, ne kuumuka ku Kalvariyo kuya mu iferno; ki Nzambi kuMubiisha ku lufu mu dituku diisâtù, bwa difuta dya cibawu cya mpekaatu yetu.

⁴² Nenku leelu ewu Yèyè ngudi mutwangaji umwepele pankaci paa Nzambi ne bantu, ne twètù tudi bafwidiibwe luse ne balekelediibwe mpekaatu patupu. Nzambi kêna nansha umanya ne twètù biine aba tukaadiku benze mpekaatu to. Mpekaatu yetu mmyediibwe mu Mbù wa Cipwamwoyi, kayiciyiku mwa kuvulukiibwa kabidi to. Twètù katwena mwa kwenza aci mu twètù biine to; tudi ne mikalu. Yèyè kêna ne mikalu to. Kadi ngiikadilu wetu wa mikalu awu, tudi anu mwa kutungunuka ne kuvuluka's, bwalu katwena bunene bukumbane to. Kadi Yèyè mmunene menemene mu mushindu wa Ûpwa mene ne mwoyi ne tutukù benze mpekaatu. Tudi bânà baa balume ne baa bakaji, mu Bwikadi Bwende. Ne bintu byônsò bivwaYe abi, mbitudi twètù. Yèyè wakalwa mpekaatu wanyi mêmè, bwa mêmè kulwa bwakane Bwende Yèyè. Yèyè wakalwa mpekaatu webe wêwè, bwa webe. . . Yèyè. . . wêwè kulwa bwakane Bwende Yèyè. Pa nanku Nzambi kêna mwa kumona mpekaatu nansha umwe mu wêwè to padi ditonda dyebe diikàle mu Kilisto Yesu.

⁴³ Muntu mukwabo uvwa wamba, kukaadi cikondo, wamba ne: “Mêmè anu mudidinge mwitabuuje cintu bu nanku, s'ndi mufwanyine kuditwa mu masanka a pa buloba! S'ndi mufwanyine kulaaba cimenga eci mukubu cilwa cikunze. S'ndi mufwanyine kuya ku cijjidi cyônsò cya maja. S'ndi mufwanyine kukwacika maala kutokola ne nzaba, ne bikwabo byônsò, bwalu. . .”

“Bwa cinyi?”

“S'nyawu ukaadi mumane kuteekiibwa mu dikubiibwa mu Kilisto. Dishiiilangana mwaba awu didi ku cinyi?”

⁴⁴ Mêmè kwamba ne: “Aci's cidi cileeja ne kwêna mucipete to.” Dinanga dya Nzambi dyôdi dididinge anu dituute ku mwoyi webe, mu bupòlòbèlè bwa Yesu Kilisto abu, wêwè's udi mufwanyine kushaala Nende mu dinanga anu dya menemene edi, mu mushindu wa maalu a pa buloba mafwanyine kwikala mafwe, anu mudi mpekaatu webe awu mufwe amu. Mushindu

awu ki wûdi umanya ne udi ne Nyuma Mwîmpè. Kabiya ne mbwalu udi mufwanyine kwela mikunda, kwela mbila, kwakula, anyi myakulu, anyi cyônsò cîdiku aci to. Kadi mpadi mpekaatu ulwa mufwe, kadi wêwè ne mwoyi mu Yesu Kilisto. Kaa, dinanga dya Nzambi, mushindu mwine udidi dibanjike, mushindu mwine udidi dikezuke's we! Nwamonu anyi?

⁴⁵ Mpindyewu mu Louisville, mu Kentucky emu, anu abidi adi panshi aa, mwambi kampanda uvwa wakula, wamba ne kuvwa nsongaakaji kampanda—kampanda. Ukaavwa mwindile ntanta mule ndambu mu nsòmbelu wende kayi musediibwe to, ûkaavwa ne bidimu bu makumi abidi ne bitaanu, anyi makumi asatu nanku awu. Kadi pende ûvwa mwânà wa bakaji mwena Kilisto wa maalu mîmpè, wa lulamatu lwetu lwa menemene elu. Nenu kuvwa muntu mulume mukwabo mu Louisville amu uvwa yêyè kayi nanku to; kavwaku yêyè mupicile mu nsòmbelu wa mwîmpè nanku to. Ûvwa muyaayaaye mu maja ne mu binwinu bya maala, ne bikwabo, kadi dîngà dituku kupetaye difwidiibwa dya luse ku mpekaatu wende ne yêyè—yêyè kulwa mwena Kilisto mulelela, mwena Kilisto wa lulamatu lwa menemene. Paanyima paa bu cidimu cijima nanku awu, kubwelaye mu dinanga ne nsongaakaji mutekete ewu, ne nsongaakaji mutekete ewu pende kumba kubwelaye nende mu dinanga dya wamba kufwa. Ki kuselanganabo.

⁴⁶ Nenu paanyima pa bôbò bamane kushaala pamwe bu bidimu bibidi nanku awu, bavwa balonda ne nsongaakaji mutekete ewu kwambilaye bayende dîngà dituku, wamba ne: “Munanga wanyi, ndi ncinka ne bidi ndambu bikole bwebe wêwè, mwena Kilisto mupyamupya,” yêyè ne, “mêmè ndi mwena Kilisto kacya pâncîvwà mwânà mukese, kadi,” mwakambaye, “bwebe wêwè, mwena Kilisto wa kânâkânà ewu, bwa kumona mwa kukandameena ma—ma—mateyi ne mateeciibwa ônsò adi enda alonda awu paanyima paa wêwè—wêwè mumane kwenza mpekaatu matuku bûngiwù nunku.”

Ki yêyè mulume awu ne: “Ee, cidi cyandamuka mvita cya bushuwa.”

⁴⁷ Yêyè ne: “Ndi muswe bwa wêwè kwikala uvuluka cintu cimwepele, cya ne mwena lukuna yêyè mukwele cibula mwaba kampanda, wêwè mudishinde ne mwalukile mu mpekaatu, kushaadi kule ne kumbelu to. Ndi muswe bwa wêwè kwalukila kumbelu.” Yêyè ne: “Neusangane kumbelu mukaji anu umwèumwè ûvwà musele awu.” Ki yêyè ne: “Mêmè nênkukwâcîshè bwa kusambila, ne kusambila kusambidilamu, ne kwalukila cyakabidi kudi Nzambi.” Yêyè ne: “Ncyêna—ncyêna—ncyêna—ncyêna muswe bwa ushaale kule to.” Yêyè ne: “Tangila, mêmè ndi musediibwe kûdi nciyi mwimanyine pa cyûvwà aci to, kadi ndi musediibwe kûdi mbwalu mvwa mukunange.” Ki yêyè ne: “Cyônsò cyûdi wenza nansha ciikàle

cinganyi, ndi mêmè anu mukunange. Ndi musediibwe kûdi mbwalu mvwa mukunange.”

⁴⁸ Ki mulume awu kuyaye ku mudimu dituku adi, bavwa bamuumvwa ucyambulula mu...mwaba uvwaye ukwacila mudimu awu. Kwambaye ne: “Mpindyewu, mmunyi mudi muntu mufwanyine kwenza bwalu bubi bibengangane ne cintu cya mushindu awu?” Pavwa mukaji, mumunange bikole mu mushindu wa ne, kayi ucyuka civwaye mwenze to, mwikàle muswe bwa kwalukilaye kumbelu bwa kumwakidila cyakabidi, ne kubangulula cyakabidi. Nwamonu anyi? Aci’s cidi cileeja. . . Mpindyewu, vudijaaku aci ku mùliyaalà mujima kadi dîbà adi upete cingenyinyeni kampanda cya cidi dinanga dya Nzambi. Nwamonu anyi?

⁴⁹ Bidi ne padi muntu ubwela mu dinanga ne Yesu Kilisto, maalu a pa buloba. . . Paudi utuma meeji ku bidiYe mukwenzele ku Bukênkè bwa Mifundu, kabiyi ku bukênkè bwa disaluka kampanda to, kadi ku bukênkè bwa malelela, bwa cidi bwalu, dîbà adi kudi kwenzeka cintu kampanda munda mwebe. Padi Dilediibwa dipyadiya dilwa, mpekaatu mmufwe anu mudi mundankulu amu. Bwa padi anu Bukênkè abu munda mwebe, mmunyi mudi mîdimà mwa kukenka’s? Kayeena mwa kukenkaku to. Aci ncyàkenzelà Nzambi umwe muntu wâkadyèla pankaci, uvwa ne bukole bwa kwangata mulayi. Nenku bu muvwa Mòsà cimfwanyi cya—cya Mubidi wa bwalu ewu, ki bwa cinyi Mòsà wakiimana pankaci bwa cisamba.

⁵⁰ Pashiishe ndi ndikonka’s, mu dituku edi, dya cikondo cya Laodikiya cya kalèngù, cya lulèngù, cya maalu a kwisùkwisù mutudi ne mwoyi emu. Twètù bônso tudi bamanye, ne tudi bafume ku dilonga *Bikondo Byà Èkèleeziyà*, ne tudi ne mwoyi mu cikondo cya ndekeelu, Cikondo cya Ekeleeziya wa Laodikiya. Kadi ciine cikondo cya lulèngù, cya kalèngù, kacyi cicyuka bwa maalu acivwavwa, cyenji cya mineku, cya mpekaatu ne dyalakana mutudi ne mwoyi mpindyewu emu, s’bidi bikemesha mudi Nzambi kayi wambaku anu ne: “Alukila cyanyima, wêwè Ekeleeziya, Ndi muswe anu kubutula musumbà mujima.” Nwamonu anyi? Ncikondo kaayi citudi twètù ne mwoyi eci’s we! Ne Yèyè pende neènzè cyôci aci dimwe dya ku matuku adi panshi aa. Tudi bamanye ne cicidi cilwa. Kakwakwikala dyela dyà muntu paanyima nànsha dikese pa bwalu ebu to, bwalu Yèyè, ùkaadi mumane kucyenza, Muntu kampanda ukaadi mufwe bwa aba bavwa baswe kupanduka. Kadi Yèyè neangate aba bavwa, anyi badi biitabe Kilisto ne bashaale beena Kilisto, bôbô nebuumushiibwe mu cijji cikole aci. Bwalu, dîbà adi Yèyè kavwa mufwanyine kucyenza to; kakuvwa mushindu wa kucyenza mu cikondo cya Mòsà to.

⁵¹ Mpindyewu mu Mukanda wa Bwakabuulwibwa, patudi tukafika ku Cikondo cya Ekeleeziya wa Laodikiya, mu Bwakabuulwibwa, nshapita mwi3, Bible mmwambe ne cikondo

eci, cikondo cya Laodikiya, civwa “cifofu.” Mmwambe ne: “Bwalu udi ‘mubanja,’ wamba ne udi ‘mubanja,’ ne mûdi ‘mudikungwijile mabanji’; ekeleeziya ya mitambe bunene, bantu biikâle ne mvwadilu wa mutambe bulenga, ya mitambe bunene yitu kayiyiku myanji kwikalaku nî mmu cikondo kaayi cyônsò, bwalu udi wamba ne: ‘Ncyêna dijinga ne cintu,’ kuyi mumanye ne udi mupele, mwena dikenga, mukengeledi wa luse, butaka, mpofo, kadi kuyi mucimanye.”

⁵² Mpindyewu bu muntu mwa kwikala mu ngiikadilu ewu, kadi wêwê mufwanyine kumwambila bwa ngiikadilu wende awu, s’mmufwanyineku kuteeta bwa kudyambulwisha yêyê mwine bu—bu yêyê ne byeledi byende bya meeji mu byôbi. Kadi padiye mu ngiikadilu awu kadi kuyiku mwa kumwambila bishîlîngâne to, kayi anu witabuuja ne ùdi butaka, kayi witabuuja ne ùdi mu mushindu awu to, dîbâ adi’s bidi bileeja anu ne yêyê mmpofo. Nzambi wa buloba ebu mmufomije mèsù a badi babenga kukwacila Kilisto mudimu, nenku badi ne. . . bampofu mu mushindu wa kabayiku mwa kumona cimanyinu citudi twêtù aba ne mwoyi mu cyôci to, dîbâ, cikondo citudi ne mwoyi. Nenku vulukaayi ne, kukaadi Kampanda mumane kwimana pankaci, ne muntu mukwabo nansha umwe kêna mwa kwimanapu to. Bidi bikengela anyi bwa wêwê kwitaba aci, bwanga abu, anyi udi wa kabutu.

⁵³ Mpindyewu, mpindyewu bwetu twêtù, bwa kuseemena pabwîpî mpindyewu ne cîndî muswe kwamba eci. Tudiku bafwanyine kwimana. . . Mpindyewu ndi ndiyiisha mêmê mwine, mu cyôci eci. Tudiku bafwanyine kwimana tumona muntu mwikâle mpofo, mpofo mu mubidi ewu, ne bamanye ne ùdi wendela pa mabwe matumbuke useemena ku lupôngù, tudiku bafwanyine mu wetu—wetu ngiikadilu wa meeji, utudi mu dinda emu ewu, tudiku bafwanyine kwimana tumona mpofo wendela pa mabwe matumbuke useemena ku lupôngù, mpofo, kadi kubenga kuteeta kumudimwija anyi? Aci’s ncifwanyine kwikala, mwaba awu, cifwanyine kwikala cya lwonji lwa menemene. S’tudi bafwanyine kwikala baa katuyi tucyuka myanda munda mwa mwoyi wetu. Nudiku mwa kudifwanyikijila, muntu wa wenda ushaala anu menemene kayi ucyuka myanda mu mushindu wa mufwanyine too ne kwikala useka, ne umona muntu mpofo, udi kayi mwa kumona ne kayiku mwa kudyambulwisha yêyê mwine to, wenda wendela kuulu kwa mabwe matumbuke anu ku bukole anyi? Aci’s ncifwanyine kwikala cintu cya—cya cibi; kubenga kwenza cintu nansha cîmwê pa bwalu abu.

⁵⁴ Ee, kùdî bâna beetu, pa buloba bujima, ndi muswe kwenza ditonda edi. Ndi—ndi ndyamba ne kudipwekesha kwônsò ne, aci cîdî pabwîpî menemene ne cîmwâ ngenza, anyi mudilongolole bwa kwenza. Nkaavwa muyiishe munda mwa bidimu, nyewu nkaadi—nkaadi mulwe too ne muntu

mukulakaji ne muyiishi mukulakaji wa nkolomo, ne mupetepete mvita mikole bûngi cyanaana, ne pâmwâpa nkaadi mupetepete bibangu, mutapiketepike mputa ya milengu munda mwanyi, ya ku mvita. Bwalu, cyanyi citupa cingaabanyina, cidiku Mukalenge mumpeeshe, kacivwa ncyâ kwikala kutwa bânâ mishiku, ne—ne kuswika kwa mabaka a bansonga, ne kujiika kwa bakulakaji to. Kadi civwa ncyâ kwikala mukwate Mwele wa mvita wa nseke yibidi ku mwalu wa mvita, ndwishangana ne mateyi a—a bumpangaanu ne a maalu a badémons, ne—ne makole a mîdimâ, mwikâle mbilwisha ne Dîyi dya Nzambi too ne pâmvwâ mmona mwena lukuna ucimunyiibwa. Ndi mupetepete mputa ya milengu, misangu yâbûngi.

⁵⁵ Pashiishe pândi mulwe ne Mukenji mu dituku edi, ne mwambile ekeleeziya maalu ândi pabwîpi ne kwamba aa. Ntu mudyanjile kwamba maalu kukaadi bidimu, paakambiikila Nyuma Mwîmpè ku mudimu ewu. Ne kakwenaku muntu mwikâle ne mwoyi pa buloba apa leelu wa Ndaaya ewu, udi mufwanyine kwamba ne Mukalenge ukaadiku mundekele ngamba nî ncinyi nî ncinyi mu Dînâ Dyende, cidî kaciya cyenzeke anu menemene muvwaci ne cya kwenzeka amu to.

⁵⁶ Mushindu mwine wakantumaYe musangu wa kumpala, ne dipâ dya kumpala adi, ne dipâ diibîdi, ne maalu adi mambiibwe anyi menjiibwe awu, pa buloba bujima, ne miliyô ya bantu baa tubala anu nunku balwe kudi Kilisto. Ne binunu makumi bya bayiishi basonsodiibwe, bâkaadi bakûtule ditabuluja didi dipaasalale myaba yônsò pa buloba leelu ewu. Ne bu mudibi ne beena Mpenta mbâtù baakidile Mukenji mwanyi, bôbò mbâkaadi bakwate cyalu. Ekeleeziya wa beena Mpenta ùdi uleeja bûngi bwa bàdi bakudimune mucima mu kasumbu kakese kaa beena Mpenta kutamba ekeleeziya mikwabo yônsò misanga ntete. Ki makumi mafwanyikija ngôwò awu's. Bwa cinyi? Bwalu bôbò mbâàkaakidilâ Bulelela ne bààkaakiidila ditabuluja adi.

⁵⁷ Nenku mpindyewu, paanyima paa dilwa dya cikondo cinene cya dyondopa dya babeedi, diipata dya badémons, ne dibiisha dya bafwe; citudi bônsò badimwene, nansha bangangabuka kabidi ne bantu banene bàâbûngi baa pa buloba. Ne dimweneka dya Mukalenge Yesu munkaci mwetu, mu cimanyinu cyacya bu munudi bamone amu, ngeela meeji ku cimano kwaka, kwônsò kudici aku, dya Mwanjelo wa Mukalenge. Ne mushindu udi beena maalu a mamanya bateekepu bukenji bwa bwena cintu, ne ciine aci cidî—ciine aci cidî mbwalu bumanya, pa buloba bujima. Ne pa kumona anu bintu biine bidiYe mwenze, byenzeka, dîbâ dyônsò. Pashiishe, piikalabi ne Dikunji dya Kapyâ dyâkakôsôlolâ ne Izaleela mu cipeela adi, mu matuku a Môsâ, ditudi . . . anyi mpindyewu pâvwâ Môsâ mubiikidiibwe ne, “Musadidi wa Mukalenge” aku, ne yèyè wakalonda Dikunji dya Kapyâ adi bufuku, ne Ditutu mundaamuunya.

58 Ne pavwa Yesu pa buloba, Wākamba ne Yêyè nguwva mwine Nzambi awu. Wākamba ne: “Kumpala kwa Abraham kwikalaku, NDI.” Ne “NDI” uvwa Dikunji dya Kapyà divwà mu cipuka civwà cilākukà kapyà, dyàkaakulà ne Mòsà mu—mu matuku a kale adi. Ngeela meeji ne aci mmu cyòci’s, Mwaneetu Vayle. Pashiishe kwambaYe ne: “Ndi mufume ku Nzambi ne Ndi mpingana ku Nzambi.” Ne paakapoopediibwaYe pa nkuruse, kufwa, ne kubiika ku lufu, ne kubànda mu Dyulu, ne kuteeka panshi mubidi Wende pa cyoshelu cinene cya Nzambi wa Cyendeleele, bwa kwikalapu kashidi bwa kwenza cyenzedi pa kaaba keetu, bwa kumanya ne Yêyè ngwákafuta dibanza dya mpekaatu wetu. Nenu mwaba awu Yêyè kwalukila cyakabidi pa buloba, mu mmwenekelu wa Dikunji dya Kapyà dinene.

59 Pòlò Munsantu, mu njila, kumpala kwa kubiikidiibwaye bu Pòlò Munsantu, ùvwa ùbiikidiibwa ne n’Shawula wa ku Taashishi. Nenu mu njila wènda ùpweka ku Damaseke, bwa kuya kakwata bamwe bantu bavwa benza mutooyi mupitepite búngi abu, ne dyala dya mbila, ne diyiiisha dya Evanjeeliyo uvwa ubengangana ne bilele bya ekeleeziya yabo, mu njila wenda ùpwekaku, dîngà dituku, lwà pa dîbà ditudi dya mundaamuunya edi, wàkeediibwa panshi kudi Bukênkè bunene. Nenu Bukênkè bunene ebu, yêyè bu mwena Yuda ne mumanye ne Dikunji dya Kapyà ndyàkalombolà bânà baa Izaleela, kadi’s ki Dyòdi edi cyakabidi kumpala kwende, kwelaye lubila ne: “Mukalenge!”

60 Mpindyewu nwênù baswe kutangila mu nkudimwinu yenu nî ngwa Roi Jacques nî ngwa Standard awu, ne yònsò, udi ne dileeta dinene M-u-k-a-l-e-n-g-e. Ne muntu kana yònsò udi mumanye Bible wende, mmumanye ne padibi M-u-k-a-l-e-n-g-e ne dileeta dinene apu, ng’Elohim, Ewu udi mudikumbanyine mu byònsò wákafùka maulu ne buloba awu, mu Genese 1.1. Ne dileeta dinene ne, “Mukalenge!” Nenu Pòlò kavwaku yêyè mufwanyine kwikala mubiikile nanku cyejeeji kampanda cya ne mèsù bitaayitaayi to, kavwaku mufwanyine kwikala mubiikile nanku cintu kampanda civwaye kayi mumanye to, bwalu ùvwa muntu mulongeshiibwe mu Mifundu. Mukolele ku makàsà a Gamaaliele, mulongeshi munene wa diine dituku adi, nenu yêyè kavwaku mufwanyine kwikala mubiikile cyòci aci ne, “Mukalenge,” bu ne kavwa mutwishiibwe ne Civwa n’Yehowah to. Wākamba ne: “Mukalenge, Wêwè udi Nganyi?”

61 Teelejaayaaku dyandamuna dya Dîyi adi: “Ndi Yesu,” umwèumwè awu makeelela, leelu, too ne kashidi.

62 Pa nanku mémè ndi ngeela meeji ne, munkaci mwa biine byònsò abi, kumpala kwa kuya kule, ne apa ne pa buloba bujima, bantu biikalà mwa kuteeleja abu, ne bàdi munkaci mwa kuteeleja mpindyewu abu, nebamanye ne ncijaadikiibwe ku cyenzedi ne cyenzedi cyònsò ne n’Yesu Kilisto umwèumwè awu makeelela, leelu, too ne kashidi. Mmwenzenze bintu byòbi bimwebimwe byakenzaYe abi, mwondope babeedi, mumanye

meeji a munda, bwalu nCileeje maalu avwa mwa kwenzeka, ne musangu wònsò anu mu ówò menemene munda mwa bidimu byònsò ebi. Ndi ne bidimu makumi ataanu ne binaayi, nkaadi mumonemone bikeena-kumona kubangila pàncivwà ne ngondo dikumi ne mwandamukulu, ne, musangu nansha umwe, kadi musangu wònsò citu anu cilelela. Nwamonu anyi? Mpindyewu, aci citi ne cya kwikala Nzambi. Nenku mêmè mwikàle ndyambidila dîbà adi ne: “Bantu badi bampofu mushindu wa kabayiku mwa kumona nunku bwa cinyi’s?”

⁶³ Ne ku musangu ne ku musangu pântù ngambila bakaji beetu—beetu pa bidi bitangila kubebula kwa nsuki yabo, ne bambi bacintandishila; ne pa bidi bitangila divwala dyabo dya bilàmbà bya mvwadilu wa masandi, divwala dya tuputulu etu, ne—ne biikàle badizanjika mushindu awu, ne—ne batungunuka ne mushindu mubi awu; ne pa bidi bitangila balume beetu mushindu uvwabo benza, banwa mfwanka, ne banwa twala twa mu nsòmbelu, ne—ne bikwabo byònsò; cibi badibiikila anu mudibo beena Kilisto, ne bangata meesa a Mukalenge ku meesa aku ne anu bwalu mbaa mu bulongolodi kampanda. Kaa, bivwa anu ne, bavwa beela meeji ne mêmè ndi mupende Nzambi. Kadi bakaji bakaadi balengele maalu anyi? Mbatungunuke anu ne kubiipa, mu ditunga dijima.

⁶⁴ Dîbà adi mêmè, mwikàle mubinduluke, (Ndi ngamba cyôci eci ne dîyì bu dipwekesha), pàmwäpa bu mûndi muntu wa munyunguluke mutu, ne mumanye ne ncivwa mukumbane to, anu kwine kwònsò aku, bwa mudimu; bu mùkaadi bààbûngì bàdyàbakeena, bààkakèngelaku kuwenzà abu. Bivwa bikole. Kadi mvwa—mvwa ndyambidila ne: “Nzambi, bwa cinyi Wèwè kuvwaku mwa kubiikila muntu uvwa mufwanyine kwikala muwènzè? Nenku ndi—ndi ndomba luse, kadi ndi—ndi mupangile. Bantu badi anu babenga kunteeleja. Nenku ndi mupangile bwa kwenza civwà cikèngelà bwa mêmè kwikala mwenze, mu mushindu kampanda, bwalu bôbò badi babenga kuteeleja.”

⁶⁵ Mààmù wanyi, udi ufuma ku diya mu Butumbi ewu, kukaadi bu—bu cidimu cijima ne ndambu nanku, mààmù wanyi, tatwëndè uvwa ci—cilembi. Ne ndi ngeela meeji ne ndi mupyane byònsò abi kudiye, bwa bìdi biitàngilà eci, bwalu mêmè—mêmè—mêmè ntu munange meetu. Ki mêmè kudyambidila ne: “Piikalà bantu bàdi bàdibiikilà ne mbeena Kilisto aba, piikalabo kabayi baswe kuteeleja Mukenji wûndi nyiisha ewu, nanku bàlekèlè cyanaana. Nèmbilekèlè mene’s, byònsò, kadi nye ku mukuna. Ne ntu mumanye mulunda mwena kùvwà...” Bààbûngì baa kunudi, mwab’ewu, mbavuluke pàmvwà mudyanjile kwamba cikondo, ngondo mitwe ku yisambombo kumpala kwa kwenzekaci, mùmvwà mwa kuya ku mwaba kampanda, mucyàmbile anu ku cibumba cya ku cyambilu eku, ne muvwaku nyama mufwanangane ne

kashà kaa—kaa nsengu misongoloke aku, ne muvwayi mwa kwikala bule bwa mètres dikumi ne ataanu, ne muvwaku mwa kwikala ours wa lwonji wa cisengàsengà wa bule bwa makàsà mwandamutekete. Nudi naaci pa mikaba ya mēyi ne bikwabo byònsò. Ngeela meeji ne nudi bavuluke ciine cikondo aci, nwènù bònsò. Ee, yèyè awu's udi usanganyibwa mukudika kuulu mu cibambalu cyanyi mwamwa mpindyewu, bwa—bwa kuleeja ne mbulelela.

⁶⁶ Mpindyewu anu pa bintu bu nanku awu, bwalu nkumpala anu menemene kwa diya dya mààmù, nenku Yèyè uvwa muswe bwa kuntuuyishaku cilunji bwa bwalu buvwa mwa kuntuuta abu, bu muvwaYe mumanye ne Úvwa ne cya kumwangata.

⁶⁷ Mpindyewu, mèmè kutwilangana ne muntu uvwa mwena Kilisto, ne yèyè udi ne citupa cinene cya buloba kwinsi kwa Alaska kwaka. Nenku mvwa mudipangadikile mu meeji ne, bu muvwabi ne nkaavwa muumuke muneemu muye ku Wesete, ne mvwa mwa kwangata mukajaanyi kumwenzaku anu diyelè mu mushindu kampanda kadi kumubweja mu cintu kampanda; mvwa mwa kuya nende kwine kuntwaku, ne mvwa nkashaala mulombodi wa mu meetu. Ne dībà adi bu Mukalenge mwa kuswa bwa mèmè kwenza cintu kampanda, mvwa mwa kulekela nsuki yanyi yileepa ne—ne mèmè—mèmè. . . ne myedi yanyi. Nenku—nenku mvwa—mvwa mufwanyine kumwàlukila ne kushaala mulombodi. Kudi anu ba-Indiens bu babidi anyi basatu badi basòmbèle mu ciine citupa cya buloba aci. Ndi—ndi anu mufwanyine kwikala mu—mulombodi nenku mufwanyine kukwacishaku Bud. Nenku bu Mukalenge mwa kuswa bwa mèmè kwenza cintu kampanda, dībà adi ndi mufwanyine—ndi mufwanyine kwamba ne: “Eyo, Mukalenge.” Mmufwanyineku kumpa cikeena-kumona. Ndi mufwanyine kudifinda kadi kupatuka kuya.

⁶⁸ Mèmè ntu ngamba ne bantu. . . Kacyakacya ncituku mwanji kudibala mèmè mwine to, muntu kana yònsò mmumanye cyòci eci, kadi bantu bakaadi bambambe ne: “Mwaneetu Branham, wèwè ewu's Mukalenge utu mukubiikile bwa wèwè kwikala muprofeta Wende.” Ee, kacya mèmè—mèmè ncituku mwanji kudibala nanku to, kadi ndi mubange kufika ku cikondo cînkaavwà pabwîpî ne kwenza nanku, bwa ndyambidila ne: “Ee, pàmwápa ki cîndi's. Piikalabi ne ki cîndi, s'nêngiikalè musòmbèle mu cipeela. Nenku pângiikalà nkaadi musòmbèle mu cipeela mwamwa, dībà's ki pâ—pâ—pângiikalà muprofeta Wende, nwamonu's, nenku dībà adi, Yèyè muswe bwa kuntuma mwaba kampanda, padiYe kayi ukwata naanyi mudimu, dībà adi ndi mutwishibwe bwa kukwataku ndambu wa mishipa mîmpè ne—ne kwenzaku bintu kampanda.” Mu bushuwa bwa bwalu, aci's civwa ndwìdì kampanda lwa mushindu wa budisu, nwamonu's, bwalu mèmè nguvwa muswe kwenza aci. Mpindyewu, kacyena anu menemene cintu cidì cikengela kwenza

to. Nenku mpindyewu aci mmêmè uvwa mudipangidikileci mu meeji bwa kwenza nanku.

⁶⁹ Nenku mpindyewu, kumpala menemene kwa *Bikondo Mwandamutekètè Byà Èkèleeziyà* kuyiishiibwabi, mudibi bizodiibwe kwaka mwamwa...Kudi bààbûngì, leelu ewu, bàvwà kaaba aka mwine musangu awu, ne bamanye mwàkabèneshà Mukalenge cyôci aci, ku cimanu paanyima pààpa, Cyôci kucileeja. Anu bwa...Mbanganyi bàdi kaaba aka mpindyewu, bàvwàpu mwine musangu awu paakalwaYe—Yêyè apu? Ki cyàkacyènzà.

⁷⁰ Pashiishe mêmè ndi mvuluka Mwaneetu Jackson musangu mwine awu. Yêyè utu neetu pa ciibidilu. Mwaneetu Junior Jackson, Méthodiste awu uvwa mwambi wa mu ba-Méthodistes. Eyowa's, s'ki yêyè ewu musômbe kaaba aka mpindyewu. Mpindyewu, yêyè wakalwa kûndi ne ciloota, ne pashiishe bàna beetu bakwabo baakalwa ne biloota bifwanangane. Mpindyewu, Mukalenge mmudileeje mwîmpè menemene kûndi, nenku kacya ncituku, ne ndi nwangata bu bantemu mu dinda emu, kacya nkaadiku munupeeshe dyumvwija dya mafi dya ciloota anyi? To, mukalenge. Bwalu, bwa Mukalenge...Ncyakucyambaku to anu pândi ncimona cyakabidi ne mmanyà cidìYe mwambe pa bwalu abu, dîbà adi mpândi nshiisha kunwambila. Nenku musangu awu kwambaye ne mvwa—mvwa ngenza disangisha mu ekeleeziya wende mwamwa, kadi yêyè, mu mushindu kampanda anyi kansanga, ùvwa mubinduluke bikole diine diloolo adi, nenku kupatukaye mu ekeleeziya amu ne kunyungulukilaye luseke lukwabo ne kutwilanganaye naanyi mu kashinyi, piine apu bantu biikàle bapicilapu. Yêyè kwamba ne: “Ndi muswe nkwambileku bwalu kampanda.”

⁷¹ Ki kundondelaye muvwaye muloote ciloota, ne lwà kuntweku mu mwaba kampanda, byenze bu mu Indiana nanku awu, ne kuvwa kakuna kaleepa, kanene kiikàle ne mashinda, kadi màyi masukùle muumushe buloba bwônsò ku lusongo aku, nenku kalwe kushaala lubwebwe byenze bu—bu lusongo lutupu pa—pa mukuna awu. Ne pashiishe mu lwine lubwebwe alu muvwa Mufundu wa umweka wa pabwawu. Nenku kwambaye ne mêmè mvwa mwimane mwaba awu ne bàna beetu bônsò baa mu ekeleeziya ewu, mwikàle ngumvwija mwine Mufundu ewu. Nenku pashiishe pàkalwà cikondo cya mêmè mumane kuWumvwija wônsò, dîbà adi...ki mu mushindu kampanda anyi kansanga, pângiikalà muumvwe ciloota aci bîmpè, mêmè kubakula cintu kampanda cyenze bu mbâlâminè, anyi—anyi mulonda wa ditumba wa mushindu kampanda anyi cintu kampanda nanku, anyi kawuvwa mulonda wa ditumba to, mvwa njinga kwamba mulonda wa—wa dituulakaja naawu bintu anyi cintu kampanda, nenku mêmè kutaatula anu lusongo lwa mukuna awu ne kulwambulula kuulu. Ne munda mwalu amu muvwa lubwebwe lutooke, cintu kampanda cya cifwanangane

ne granite anyi—anyi cintu kampanda cya cifwanangane nende, lubwebwe kampanda lutooke luvwà kaluyi ne cintu cifundapu to. Ki mêmè kwambila bânà beetu abu ne: “Shaalaayi kaaba aka nwikalaayi anu kacya nwatangila pa Cyôci eci.” Nenku mêmè, pavwabo bônso munkaci mwa ditangila apu, mêmè kudifinda e kupatuka munkaci mwabo amu ne kwasa lwendu mutangile ku Wesete. Ki Mwaneetu Jackson kwambaye ne yêye kummona mbânda pa kakuna kampanda, ne pathiishe pa kakuna kakwabo, ngenda nkeepa ngenda nkeepa, nya mutangile ku Wesete. Nudi bavuluke bwalu abu.

⁷² Ee, dyumvwija dya cyôci aci, mu bushuwa bwa bwalu, dyakafidiibwa kaaba aka ku ekeleeziya eku kumpala kwa kwenzekaci, bwa ne—ne dîbâ adi mmpindyewu ewu, dîndî mêmè ngiitabuuya ne, dibuulula mu kaabujima kaadi kupicila mu cikondo cijima cya Luther, cya Wesley, ne John Smith, Alexandre Campbell, ne bakwabo bashiileshiilangane bâàkayiishâ biimanyine pa Bible abu, ne pathiishe twêtù kulondesha mu Bible ne kuleeja ne nekwikale Mukenji wa—wa mwanjelo wa mwandamutekete. Ne ku mwadi wa mpungi wa Mukenji wa mwanjelo wa mwandamutekete, maalu masokoka ônsò a Nzambi neamanyishiibwe. Dîbâ adi ki padi palwa mikungulu mwandamutekete yidi kayiyi yumvwika ayi.

⁷³ Nenku mpindyewu piikalabi ne cikondo cya nshiikidilu aci ncyôci citudi ne mwoyi eci, mutudi balwe bapicile mu dibingishiibwa, dijidiibwa, dibatiiza dya Nyuma Mwimpè; ne bapete bimanyinu, maalu a kukema, ne bintu bishiileshiilangane byônsò. Ne mapâ akaadi maalujila ekeleeziya, bu mudi, dyondopa dya kudi Nzambi, ne ciprofeta, ne—ne dyakula dya mu myakulu, ne dyandamuna. Nenku nansha mudibi ne byôbi abi mbabikonyangaje, bya bibi menemene, kadi nansha nanku, aci kaciyena ne cidici cyumusha to, cya cîmpè cidikù. Cya cilelela cidikù, cya dipâ dilelela ne dishuwashuwale, dya dyakula dya mu myakulu, ditù ne cya kwikala misangu yônsò mu Ekeleeziya.

⁷⁴ Tudi ne ditentula bûngi cyanaana. Tudi ne bantu badi bajuuka ne bateeta kwenza maalu bu beena Kilisto, kadi nsômbelu yabo kayiyi yikumbanangana to, pa nanku's kudi cintu cipampalamuke. Yesu wakamba ne: “Ku mamama abo nkunwabamanyina.” Nwamonu anyi? Mushindu awu ngunudi numanya mwena Kilisto, ku mushindu wa wende nsômbelu. Kwikadiku utupika uya muulu kupita bule bwa nsômbelu webe to. Pa nanku anu... Kadi mu aci, kadi aci—aci ndémon wenza cifwebe, bwa kulamina beena kwitabuuya balelela ne bashuwashuwale kule ne cintu cyaCi cilelela. Kadi Nzambi atukwacisheku bwa twêtù kutapulula ne kwikala bakumbane mwa kujingulula pankaci paa cya bushuwa ne cya mashimi. Ne—ne Diyî nedilongolole cyôci aci misangu yônsò.

⁷⁵ Mpindyewu tudi tusangana ne, mu cyôci eci, nkaadiku munwâmbile cyôci aci, dyumvwija pa Lubwebwe alu. Ne

Lubwebwe alu n’Kilisto, lùvwà mu ciloota cya mwaneetu aci alu, ne aci m’Bible. Ne munda mwa bidimu byònsò ebi, Bible mmuumvwijamvwija, too kakuyi mpatà to ne mutukaadi baMupe dyumvwija dya cikwántèndeleelelu kuumukila anu ku ntwadijilu too ne ku ndekeelu. Ne dipà dya ndekeelu didi disàkidila mu cikondo cya Laodikiya, cidì ciikàle cikondo cya mwanjelo wa mwandamutekete kuyiishaye, mu cikondo cya Laodikiya, pa dîbà adi, ne nekwikale bintu bûngì cyanaana bivwà byumvwijiibwe bibi munda mwa bikondo.

⁷⁶ Bu mwakayiisha Luther dibingishiibwa, kadi wakadishiya kadiciyi dya bakontononaku to bwalu yêyè kaakalaala ntanta bule bukumbane to. Ki pashiishe... Pashiishe kuvwijabo ekeleeziya bulongolodi. Kacya Luther kavwaku mumuvwijaku bulongolodi to; mpaanyima paa Luther. Ki pashiishe Wesley kumwenekaye. Ne paanyima pa Wesley, kupetabo ekeleeziya wa baa ba-Wesléyens. Ne paanyima paa aci kulwaku John Smith, Baptiste awu; ne pashiishe Alexandre Campbell, ne bakwabo. Kadi bantu abu, balongolodi abu, kabaakalaala ntanta bule bukumbane bwa kukungwijabo byònsò abi kaaba kamwe to. Ne, pa nanku, bivwà bishaadile mu njila bûngì cyanaana byakashaala, bya bu nanku. Nenu paakenzabo aci, cileejilu, cya dibatiiza dya mu mâyì dyakaalujabo kudi John Smith, dibatiiza dya mu mâyì mu—mu diinyijangana; kadi biikàle basoka mwânzù kampanda. Ne byàbûngì bya ku bintu byàkashiilabo mu njila abi. Ne pashiishe patudi tufika ku ndekeelu, budi Mukenji wa ndekeelu naabu mbwa kwolola byònsò abi, bwa kufikisha bintu ebi ku “diitabuuja dimwe, Mukalenge umwe, dibatiiza dimwe.” Nwamonu anyi?

⁷⁷ Kadi mpindyewu paanyima paa Bible mumana kuumvwija, mu kaabujima, dîbà adi nudi numona ne ncikangule lusongo lwa Lubwebwe ludi ne mmwenekelu wa cipaapu cya musaka alu. Kadi kî ndilongesha pa bidi bitangila cipaapu cya musaka to, kî ng’aci to, bwalu ndi... Muntu utu ulongesha dilongesha dya cipaapu cya musaka aci awu, ngeela meeji ne yêyè awu ngudi mumanye cidiye wamba aci. Mémè ncyèna mumanye kantu nansha kamwe pa bwalu abu to. Kadi, nansha nanku, civwa ne mmwenekelu wa cipaapu cya musaka, kadi mùsongà pa cipaapu cya musaka awu kawutuku mwanji kuteekiibwapu kacya to. Nkaadi mufike mu Caire ne—ne mu Ejipitu, ne—ne mùsongà awu kacya kawutu mulwe to, bwalu civwa ndibwe dya mu ditumba, civwa ndibwe dya mùsongà. Mu ekeleeziya Divwa dibwe dya mu ditumba. Mu Ekeleeziya mu kaabujima, Divwa ndibwe dya mùsongà. Pa nanku kaDituku dilwe to. Divwa dibengiibwe, Kilisto. Kadi neDilwe. Ne mémè ndi ngiitabuuja ne paalwaDi, Ekeleeziya neangate mbungakeenu wa ukafika mu mushindu kampanda, kuumukila ku dibingishiibwa ne Luther, dijidiibwa ne Wesley, ne mukenji wa beena Mpenta newufikishe Ekeleeziya ku dishaala wa banyààbanyà, ne mudimu kampanda wa bwambi

newikale munkaci mwa bantu abu mu mushindu wa ne neciikale menemene anu mudimu wa bwambi umweumwe wakenza Yesu Kilisto awu. Wôwò awu ki watwala Yesu kadi kubakula cintu mu kaabujima kuya naaci.

⁷⁸ Ba-Luthériens, ba-Presbytériens, ba-Baptistes, ba-Méthodistes bônso baa meeji matooke ne baa lulamatu abu, ne ewu yônsò udi mulediibwe ku Nyuma wa Nzambi awu, ne bangaciibwe pamwe ne Yesu Kilisto paalwaYe. Ki cîndî mêmè ngiitabuujja ncyôci aci. Ntu mpangakana ne bamwe baa ku bânâ beetu baa beena Mpenta bätù biitabuujja ne bàshààdîlè baa ekeleeziya ng’aba biikalà mwa kwangaciibwa mu cikondo cya ndekeelu eci. Mêmè ndi mpangakana naabo mwaba awu, bwalu Nzambi. . . Mmunyi mudi muntu mufwanyine, ne mmunyi mudi Nzambi mufwanyine. . . Bu twêtù mwa kwamba ne: “Mmunyi mudiYe mufwanyine kucyenza?” Yêyè’s udi mwa kwenza cidiYe muswe kwenza aci. Kadi Nzambi, Yêyè wâkalaya Luther awu, ne mu dibingishiibwa, ki cyônsò civwabo bamanye. Nwamonu anyi? Yêyè wakalaya bwa kwangata Ekeleeziya. Nenku Yêyè. . . Mêmè, ndi mwa kwitabuujja ku ngâsâ wa Nzambi, ne ku dikwacisha dya Mifundu, kucitwa nyama ku mikolo. Bwalu, Yêyè kaakalwa mu cilù cya kumpala to, kadi bôbô bavwa baye mu tulu; ne mu cilù ciibîdî; kutungunukabi anu nanku. Mu cilù cya mwandamutekete, ki mwakalwaYe. Nenku ki Cikondo cya Mwandamutekete cya Ekeleeziya ncyôci aci, ku Mukenji wa mwanjelo wa mwandamutekete. Nwamonu anyi? Nenku paakalwaYe, virgo yônsò ayi yakabiika ne yakalongolola myëndù yaayi. Nwamonu anyi? Ba-Presbytériens, ba-Luthériens, ba-Baptistes, bônso badi balediibwe ku Nyuma wa Nzambi abu, ne baye mu Dyambwibwa adi. Mêmè ndi ngiitabuujja ne Mukaji-musela neabiikidiibwe mu ciine cikondo aci. Ndi ngiitabuujja ne newikale bamwe mu matuku a ndekeelu biikalà kabiyi bikengela bwa kulabulabo lufu to, kadi biikalà mwa kushintuluka mu katanci, mu mubunyi wa dîsù.

⁷⁹ Mpindyewu, bu munuvwa bamone, mu ciloota cya Mwaneetu Jackson, ne kapavwa cintu cifunda pa Lubwebwe elu munda amu to, ki cîmvwâ muyiile ku Wesete ncyôci aci. Mpindyewu, bu mwênzèkîci, ne mêmè kunwambila ne, dîngâ dituku nênnwâmbilè civwâci cyumvwija. Mvwa muye ku Wesete mbwa cyôci aci. Nenku mêmè kunulondela cikeena-kumona aci, ciikalà bantu, ne pa mukaba wa mêyi ne badipu mu dinda emu aba, mwa kumanya mu kwangata kwa *Bakalenge, Tudi Dîbâ Kaayi?* Ne muntu kana yônsò wa kunudi nwênù bânâ beetu badi bâteèlejâ mikaba ya mêyi yêyè kayi ne Diiyiisha adi, kadi muswe kulonda Edi, àngatè: *Bakalenge, Tudi Dîbâ Kaayi?* Kumpala, mbingu ne ngondo kumpala kwa kwenzekaci, mvwa mumone mwaba ewu cikeena-kumona cya mêmè mwikàle nsanganyiiibwa mu Tucson, ku nord kwa Tucson; kuvwa ne cya kwikala ku esete kwa Flagstaff, ku nord kwa Tucson; ne mwikàle ntuula mpoopo

ku mikolo ya mupanu wanyi, nenku—nenku dikubakuba diikàle mwa kutuuta difwanyine mu bulelela bwa bwalu kunyukusha ditunga dijima. Mbanganyi baa kunudi badi bavuluka aci? Ncya bushuwa. Difwanyine kunyukusha ditunga dijima.

⁸⁰ Ee, nyewu byenzeke ne muntu nansha umwe ikalèpu mu dinda emu wa ku bàvwà biimane mwaba awu pavwaci cyenzeke. Ncya bushuwa ne civwa cituule mbwebwe ku mukuna aku. Nenku mpindyewu badi. . . Tudi tusangana ne, mu ciine cikondo aci, mêmè kumona Banjelo mwandamutekete mu—mu mmwenekelu wa cipaapu cya musaka, bààkapwekà kumbakula ne kuyabo naanyi muulu. Ki kulwabo naanyi ku Esete, bwa kukangula Bitampi Mwandamutekete bwa Nzambi. Pawikala kuyi mbupete to. . . Bu Yesu mwa kunengakana, ne mêmè. . . bânà baa biikùlù baanyi, bânà baa Paul mwânà, aci neciikale anu Bulelela bwa Cyendelele bwa Nzambi udi ne mwoyi. Mpindyewu, aci civwa mbwa kujandula, eci civwà cikangila munda mwa mukuna ewu, civwà kaciyi cifunda aci. Bivwa bikengela kuumvwijiibwaci. Nenku pângààkaalukilà, Mwanjelo wa kumpala, mu diloolo dya kumpala, kukangulaye Citampi biikàle bibengangane ne kantu kana kònsò katukaadiku twètù aba bumvwe kacya baatulela. Nenku byònsò mwandamutekete abi kumwenekabi mushindu anu umweumwe awu. Aci nudi bamanye. Nuvwapu kaaba aka paakenzekaci, bààbùngì baa kunudi.

Nenku, mpindyewu, ncivwa mucimanye mwine musangu awu to, kadi. . .

⁸¹ Mwaneetu Fred Sothmann, ndi mumanye ne yêyè udi kaaba aka. Ne ndi mutwishiiibwe anu menemene ne Mwaneetu Norman udi kaaba aka. Tuvwa tusanganyiibwa. . . Bivwa bikengela bwa mêmè kuya ku Houston bwa kuya kasùngila mwânà wa balume mukese awu ku lufu lwa mu nkwasu mutwa ku nzembu. Ne pashiishe mêmè kwalukila e kuya mu ditwa dya buluwà ne bânà beetu. Nenku mu dinda adi, mvwa mwimane mwaba awu ntuula mpoopu, anyi—anyi cidibo babiikila ne *mpota ya mbwa* kuntu kwaka aci, ndituula mpoopu ku mukolo wa mupanu. Ki dikubakuba kutuutadi anu mushindu uvwaCi cyambe awu. Mmudibi anyi, Mwaneetu Fred? Ne mvwa—mvwa—mvwa ne cya kwikala mutupike muumuke pa buloba. Nenku lwà kuulu kwanyi menemene kuvwa Banjelo baa Mukalenge bàvwà batume Mukenji abu, bwa mêmè kulwa kaaba aka bwa kukangula Bitampi ebi. Bwa cinyi kaaba aka, bwa cinyi ku tabernacle? Ncivwa mucyènzèle kwòkò aku bwa cinyi? Mbwalu mvwa mwenzele ekeleeziya wanyi ne Nzambi mulayi ne, Diiyisha dipyadiya kana dyònsò divwa mwa kupatukila mu tabernacle ewu, badikwacila pa mukaba wa mêyi mwaba ewu. Nenku Yêyè uvwa unkwacisha bwa mêmè kushaala mukwate ku dîyi dyanyi, bwa kushaadila kaaba aka bwa kucyenza. Ki dyakamwe mêmè kwalukila cyakabidi.

⁸² Nenku, mpindyewu, ncivwa mumanye mwine musangu awu ne, bavwa munkaci mwa kukwata cyôci aci maafôtô to, kùdi beena maalu a mamanya, paakapwekelela Banjelo abu bafume mu Dyulu, bwa kutwala Mukenji. Nenku nudi bavuluke ne, ngâkamba ne Ewu uvwa ku luseke lwa dyabalume lwa cisumbu cya Banjelo aci, mu mushindu kampanda, ùvwa ne cyâdi Cyende cituka paanyima, ne mapwapwa Ende. S'nudi bavuluke ne ngâkamba nanku's, nwênù bônso? Ne mushindu wûmvwà muMutangile's? Yêyè uvwa musunguluke bikole mu bakwabo abu. Ne ncivwa mumanye ne bavwa munkaci mwa kuCikwata fôtô to, bwalu dyakamwe ngâkalwijakaja e kulwa ku Esete. Kadi mêmè munkaci mwa kwalukila kwanyi ku Tucson, ki Cyôci aci mu bibejibeji byônso bivwabo bamone pêpi ne mu ditunga dijima, anyi too ne ku Mexique, ne ku ma États ônsò a ku Wesete, ne ngeela meeji ne ncibejibeji cya *Courier* cya muneemu emu aci. Civwa mmu Presses Associées. Mbanganyi bavwaku bamone, *Ditutu Didi Kadiyi Dyumvika Mu Dyulu?* Monaayi byanza. Ki mpindyewu cikandakanda cya *Life* kucipatulaci. Ne mêmè ndi ne—ne kaabwalu kafunda aku mwaba ewu mu dinda emu, mu cikandakanda cya *Life* kaaba aka, bwa kuleeja. Mpindyewu's ki Cyôci eci, musangu umweumwe wûmvwà nsanganyiibwaku awu. Nudi bamone cipaapu cya musaka cya Ditutu adi aci anyi? Mêmè mvwa mwimane anu mwinshi menemene mwa cyôci eci. Nenku mwaba awu, nudi numona Mwanjelo udi musunguluke lwà ku luseke lwa dyabalume awu anyi? Nudi numona dipwapwa Dyende disongoloke adi anyi? Anu civwà cyambiibwe menemene. S'ki cyôci eci cimweneke ku Mexique ne ku myaba mishiileshiilangane kuvwabo bakwacile fôtô. Mpindyewu, mwena maalu a mamanya ewu udi uteeta bwa—bwa kupeta maluba ônsò pa bidi bitangila fôtô awu, adiyè mwa kupeta awu, pa bidi bitangila bantu badi ne mwine fôtô ewu. Yêyè udi munkaci mwa kucilonga.

⁸³ Mpindyewu, ùdi wamba kaaba aka ne kabyena mwa kwenzekaku to bwa kwikalaci ditutu, bwalu mutaleela kawutu wùbànda wupita, mùndi mufwanyine kwamba, pa butumbuke bwa kilomeeta inaayi anyi dikumi ne isaatu to, cintu bu nanku. Patutu tuya dyamwamwa dya mbû tutu pa ciibidilu tubuuka ne ndeke mu butumbuke bwa makàsà binunu dikumi ne citeema, ne tudi tusanganyiibwa kuulu kwa mvula ya bipupu dîbà adi. Kadi edi ditutu dyôdi, bilondeshile kaabwalu kafunda kaa mwena maalu a mamanya ewu aka, didi mu butumbuke bwa kilomeeta makumi anaayi ne umwe ne citupa. Ndifwanyine kwikala mu butumbuke bwa kupita mutaleela mu ntanta wa kilomeeta ne kilomeeta yàbûngì. Ne yêyè mmwambe, padiye mukenkete myaba yônso ayi, ne mpindyewu, nudi bamanye ne mêmè. . . Mbanganyi badi bavuluke ne ngâkanwâmbila ne: "Civwa cidile mudi ndeke upita cimanu cipumbishi cya dîyi amu"? Nudi bavuluke anyi? Kadi kakuvwa ndeke nansha umwepele mu distriki amu to. Ki cidi mukanda awu wamba kaaba aka. Bavwa

bakenkete mwaba awu. Kakuvwa ndeke nansha umwe to, ndeke kayivwaku mibuuke nansha umwe muulu amu to. Kadi, kakuyi anu aci to, kacivwa cifwanyine. . . Difwima dîtù paanyima paa ndeke adi kaditu cîngà cintu to anu kapeepa cyanaana kiikàle kàpandika, mutaleela, bwalu ndeke ewu udi ùkàkòka, bu mudiye ndeke wa jet. Padiye wenda udikoka apu, ùdi wenda ùpanda mutaleela mu kapeepa amu. Kêna mwa kucilekelaku to, padiku anu ndeke wa jet apu, bwalu bidi bikengela bwa yêyè. . . Ki cidiye usaka pambelu, nenku mutaleela ngudi wenda upatuka mu yêyè amu.

⁸⁴ Kadi's ki cyôci eci, kilomeeta yàbûngi kumutu kwa mwaba udi kawuyiku mwa kwikala mutaleela to, ne kakuyi ndeke to mu distriki amu. Ne kakuvwaku mwa kwikala mutaleela muulu amu to, wà mulembelele muulu amu diine dituku adi. Cidi ne bucyama bwa kilomeeta makumi anaayi ne mwandamukulu, ne butumbuke bwa kilomeeta makumi anaayi ne umwe ne citupa. Nudi numona anyi? Anu menemene muvwabi bwa fôtô wawa, pângààkanwàmbilâ ne: "Mwanjelo wa Mukalenge udi ne mmwenekelu wa Dikunji dya Kapya", kukaadi bidimu, kumpala mene kwa kabayiku banji kuDikwata; Nzambi udi ufikisha maalu a mamanya ku dijingulula ne Cidi Bulelela. Nenku apa, bwa ciprofeta civwa cifidiibwe aci, Nzambi udi ufikisha maalu a mamanya ku difila dya bujaadiki ne Cidi Bulelela. Mpindyewu tudi panshi anyi tudi pa kazubu? Ndi muswe kulama cyôci eci, bwalu ndi—ndi mwa kwakulaku ne mulunda wanyi kampanda, udi kaaba aka mu dinda emu, bwa—bwa kufunda *Bitampi Mwandamutekète* abi. Mmufwanyine kujinga kukwata mudimu ne eci bwa bwalu abu. Ne pa nanku wêwè udi ne dipasa dya cyôci aci, mona's, pawikala naadi, udilame bwa kwikala kutapaku dîsù. Nwamonu anyi?

⁸⁵ Mpindyewu yêyè mmuswe kujandula, kadi mbifwanyine kwikala ne dikwacisha kaayi bwa kuya kamwambila ciine aci? Yêyè's mmufwanyine kuciseka. Nwamonu's, yêyè mmufwanyine anu kuseka cyanaana. Pa nanku kanwikadi nwela masanga etu pansi mushindu awu to. Kadi twêtù tudi bamanye, Ekeleeziya mmumanye, ne Nzambi mmumanye ne m'Bulelela.

⁸⁶ Ne pashiishe pâmvwà munkaci mwa kusambila pa cyôci cyena-bwalu eci, ndikonka ne cidi cifwanyine kungenzekela ncinyi, kadi nudi bamanye kûnkaavwà nsanganyibwa anyi? Ku nord kwa Tucson, ku esete kwa Flagstaff; anu menemene's, bilondeshile myaba, kûmvwà munwâmbile, ngondo ne ngondo kumpala kwa kwenzekaci, ne mvwa mwa kwikala mwimanepu. Ne anu bilondeshile cibejibeji eci menemene, ne bibejibeji ne cikandakanda eci, ne bujaadiki bwetu twêtù biine, anu mwaba udici cyenzekele menemene. Nzambi mmupwangane ne kêna mwa kushimaku to, ne necyenzeke.

⁸⁷ Nudi bavuluke pa mukaba wa mêyî, *Bakalenge, Tudi Dîbâ Kaayi?* Nêncyâmbûlûlê cyakabidi: "Vulukaaayi ne, cintu

kampanda cidi pabwîpî ne kwenzeka, cya citambe bunene.” Ne patudi twakulangana apa Cikaadi cifikishe ditunga dijima ku diCifidila bujaadiki. Cibejibeji cyônsò ku Presses Associées, ne cimwe cya ku bikandakanda byetu bya bitambe kwikala bya mushinga, ne bikwabo byônsò, biikàle biMufidila bujaadiki, kadi kwônsò kî nkwanji anu kujika to, too ne mpindyewu. Kadi ncisamba cya dyêsè kaayi, cisamba cya—cya dyêsè cidi cya beena Kilisto, bwa kumanya ne mu dîbà dya mîdimà edi, padiku kakuyi ditekemena nansha dya kânà bilondeshile maalu a mamanya, ne bombe bwa mushinda butwîndîle. Ne kakuyi ditekemena nansha dya kânà mu malongolodi etu, bwa kudisangawu, àdi munkaci mwa kudyenza cimuku ne cimanyinu cya nyama wa lwonji. Ne piikalà ditekemena dyetu dyônsò dimane kuya mushindu awu, mu maalu etu a cibucilu, dya bwobumwe bwetu bwa bwena Kilisto munkaci mwa malongolodi. Ciyaaya bwa kuupuka mu cyena Katolike, ciine ciikalà cimanyinu cya nyama wa lwonji mu nsangilu wa maekeleeziya aci.

⁸⁸ Kadi, ne aba badi banange Nzambi ne biikàle bakeba cintu cya bushuwa, cya ne Nzambi mwine Wâkafila mulayi mu Bible awu, ngudi uwadija kumpala kwetu twêtù batangile ewu; ne mwikàle ufikisha ekeleeziya, ne bantu, ne maalu a mamanya, ne bikandakanda, ne byônsò, ku dijingulula ne Yèyè udi anu Nzambi ne udi mwa kuuja milayi. Cikondo kaayipu’s we!

⁸⁹ Pashiishe ku Sabino Canyon mu dinda adi, mêmè munkaci mwa kusambila ne kudikonka ne civwa mwa kwenzeka ncinganyi, mubaale byanza byanyi kudi Nzambi, ku lusongo lwa mukuna awu, Mwele wa mvita awu kumatawu mu cyanza cyanyi; mwikàle ne cilabi cilema masanga, cikùbi cyawu ciikàlekù, ne mwele mule bu wa centimètres makumi citeema, ne ùbàlakana bu mudi cyamu cya lwesu anyi bu mudi cyamu cishilè cya cibàlakana, mutwe bu kapaaya. Kadi nciyi mmanya ne civwa ncinyi to. Ki mêmè kwamba ne: “Mêmè’s ntu ne bwôwà bwa bintu ebi.”

⁹⁰ Nenku anu pa dîbà adi Dîyî kwakuladi, dyàkanyùkushà lupongo lwa mabwe alu. Dyamba ne: “Ewu m’Mwele wa Mukalenge awu.” Ne Mwele wa Mukalenge paawu’s n’Dîyî dya Mukalenge, bwalu Dîyî dya Nzambi ndîdî ditwe kupita mwele wa mvita wa nseke yibidi.

⁹¹ Pashiishe ngaalukila ku cyôci aci, dîbà adi, mu ciine cikondo aci, mwaneetu wa balume kampanda mutekete wa bukutu mu ekeleeziya emu...Ne yèyè uvwa musalaayi ne uvwa mwashiibwe mazaji mamusunsule yèyè yônsò mu busalaayi, pabwîpî ne mubidi mujima, ne kushaalye mulaale panshi ùpunga ne lufu, nenku ùvwa wamba ne ùvwa mufwanyine...Kabavwa, bondopyanganyi baa mu busalaayi abu’s, kabavwa beela meeji ne yèyè ùvwa mwa kupândakù to, ne kavwaku mukumbanyine dipicishila dîbà to, yèyè ukaavwa bu muye kale. Tujilujilu twa tunene twa mu mukolo

wende tuvwa tutaayike; diboko dyende dikese adi dyamba kutuula anu menemene; mukolo wende, mukolo umwepele mutuuke, mwambe kutuuka. Kadi Nzambi kumonaye ngàsà, kumusungilaye ne kumwondopaye dîngà dituku.

⁹² Yèyè, Mwaneetu Roy Roberson, uvwapu pavwabo bakwate mwine fôtô awu mu Houston mwamwa. Mushindu uvwabo bambile mukajende mu cikeena-kumona, civwaye munkaci mwa kwenza munda mwa dituku adi, ne muvwaye mupete lutatu ne muvwalu mwa kwondopiibwa. Ki cyôci aci kuvwijaci bayende mwena kwitabuuja. Kadi yèyè bu muvwaye musalaayi, ùvwa mu mushindu kampanda (ndi ntekemena ne yèyè neamfwileku luse bwa kwamba kwanyi kwa bwalu ebu) muumukile ku—ku luseke lwa makoyi, lwa maalu anu pa ôwò, dituma dya mèyi mu busalaayi. Bu muvwaye kùmàndà wa bantu, bivwa bikengela kwikalaye utuminangana mèyi, wamba ne: “Ûcyénzè!” Nwamonu anyi? Kadi yèyè—yèyè kwitabuuja, nansha nanku. Kadi munanukile, ne ùlwa mwaba ewu ku ekeleeziya eku ne ùmona citambe-mfukilu, kwambaye ne: “Bwa aci ndi ngiitabuuja, kadi cidì mbwa muntu kampanda mukwabo.”

⁹³ Bufuku kampanda Mukalenge kumubiishaye, mu dinda kampanda. Tuvwa basòmbè, mèmè ne yèyè, byenze bu mu Yelusalema ku Meesa a Mukalenge, ne mèmè nguvwa wakula. Yèyè kavwa mwa kucyumvwaku to. Nenu Mwaneetu Roy, udi musòmbè kaaba aka, muntangile buludi ewu, ki kucimonaye. Ki yèyè kumbiikila, mu Houston . . . anyi mu Arizona mwamwa, anyi kumfundilaye mukanda kuntumina nenku ki mèmè kumwandamwina ku nshinga. Kwambaye ne: “Wèwè uvwa musòmbè mwaba awu, Mwaneetu Branham, ne mèmè kumona Dikunji dya Kapyà dinene adi dibwela ne dikwangata, ne dikuumusha ku meesa a Mukalenge awu diya neeba, ki wèwè kuya mutangile ku wesete.” Bwalu yèyè uvwa musòmbèlè lwà ku luseke lwa ku esete muntangile ngenda nya ku wesete, nenku Bukènkè ebu mbwàkabwelà kungangata ne kupatuka naanyi.

⁹⁴ Kwambaye ne muvwa mmu dinda kampanda, cyenze bu ne civwa ncikeena-kumona nanku awu. Kujuukaye mu bulaalu amu, bivwa bu pa díbà isatu anyi inayyi wa mu dinda nanku awu, cintu bu nanku awu, ki kumonaye cyôci eci cyenzeka. Nenu kwambaye ne wakeela mbila mikole, byenza bu munda mwa matuku’s, ne: “Mwaneetu Bill, alukila!” Nenu mèmè ne Roy tutu bânà baa muntu baa menemene. Tutu basòmbèlè kaaba kamwe, ne tutwa buluwà pamwe, ne tudi anu bânà baa muntu beetu aba. Nenu yèyè—yèyè kungeela mbila mikole, too ne mwàkalwà dîyi kumupata ne muminu kumuuma ne: “Alukila! Mwalujaayikwee! Mwalujaayikwee,” ùdila ne mwadi. Kwambaye ne mèmè . . . Ki Dikunji dya Kapyà adi dîdì dyàlukilà edi, anyi Ditutu dyàlukilà, ne Yèyè kunshikika kumutu kwa meesa awu, kadi nkaavwa mushintuluke. Bwa Mwaneetu Roy

yêyè civwa mbwalu busokoka, bwa mûnkaavwà mushintuluke, mwikàle ne mmwenekelu mushiilangane. Ndi nteeka eci lwà mwaba ewu bwa cintu kampanda cindi muswe kuvuluka pa, “mwikàle mushintuluke,” pângààkamupà dyumvwija dyaci.

⁹⁵ Aci civwa nkumpala menemene kwa mêmè kwalukila bwa Bitampi Mwandamutekete. Pângààkaalukilà bwa Bitampi Mwandamutekete, dîbà adi mêmè. . . Dinda kampanda kupetanganaye ne Billy, nenku ùvwa ukeba bwa kuyiikilangana naanyi. Kadi mvwa ne mudimu, mwikàle nsambila bwa Bitampi Mwandamutekete. Ki dîbà adi kungambilaye bwa. . . Cyôci kwenzeka cyakabidi, ne kwenzekaci cyakabidi. Mwaneetu Roy, mêmè mutupakane, wamvulwijaku wêwè—wêwè. Ki kwambaye ne yêyè—yêyè kubiikaye cyakabidi, mu—mu dinda, ngeela meeji ne mbwebwebwe cyakabidi mu dinda. Ki mwaba awu kutangilaye mu cibambalu amu ne kumonaye Bukênkè bunene ebu, anyi Ditutu pa mukuna kampanda. Yêyè mmungeele lukonko, anu abidi adi panshi aa ne: “Kuvwaku bwalu kampanda bwa butangila Ditutu diikàle pa mukuna kampanda anyi,” ne mêmè kwamba. . . “mu Bible?”

⁹⁶ Ki mêmè kwamba ne: “Eyowa, pààkabàndàbo ne Peetelo, ne Yakobo, ne Yone ku mukuna, ne Ditutu kubwikiladi Mukalenge Yesu. Nenku—nenku Nzambi kwakulaye, kwamba ne: ‘Ewu udi Mwan’Aanyi munanga.’” Ndi muyiishe pa cyôci aci kaaba aka, abidi adi panshi aa. Kaadiyiisha kakese, bânà beetu bàtù bateeleja mikaba ya mêyi bôbò mbafwanyineku kuumvwa: *Mutèèlèjaayi Yêyè*. Ndi ncinka pâmwâpa ne nudi naaci pa mukaba wa mêyi. Ndi mutwishiibwe.

⁹⁷ Nenku kwambaye ne wàkabànda kuulu kwa mukuna aku. Nenku mmwenze anu ùbànda, mêmè mvwa mwimaneku. Ki Dîyi kufuminadi mu Ditutu, (Kî mmwômò anyi, Mwaneetu Roy?) ne kwambadi cintu kampanda cya bu nunku ewu: “Ewu mmusadidi Wanyi. Ne Mêmè ndi mumubiikile bwa kwikalaye muprofeta bwa cikondo eci, bwa kulombolaye cisamba anu mwakenza Môsà amu. Ne yêyè mmupeeshiibwe bukookeshi, mmufwanyine kwamba dîyi cintu paaci cipatuka.” Anyi cintu kampanda cya bu nanku awu, bu mwakenza Môsà amu, bu mudi kwamba dîyi njiji yipatuka. Nenku tudi bamanye bwalu bwa nshindi, ne bikwabo, ne bwa bintu bikaadi byenzekenzeke. Hattie Wright mukese paanyima pàpa wawa, ngeela meeji ne nudi bamanye civwà cyenzeke kwende kumbelu. Ki kumwambilaYe ne mêmè mvwa mwenze cyàkenzà Môsà aci.

⁹⁸ Ki mpindyewu yêyè kungambila nanku awu, pâmvwà mfumina ku—ku lwendu kampanda. Kadi mu aanyi meeji mêmè, mvwa mupangadike ne nênyè kwa Bud, bwalu yêyè udi mu lutatu kuntu kwaka, cilembi awu.

⁹⁹ Kumpala kwa kuumuka kaaba aka. . . Ndi mufwanyineku kusakidila eci, nenku netulwijakaje. Mêmè mvwa muloote

ciloota cya pabwaci, ciloota cya pabwaci. Nenku ndi ntekemena ne, piikalà bukonde bwanyi wa balume mupete cyôci eci, kaciyena cimumtapa ku mwoyi to. Ne ndi ntekemena ne ncyêna ntapa mukajaanyi ku mwoyi to, yêyè udi musômbe kaaba aka mpindyewu ewu. Kadi mmucimanye. Kukaadi ngondo yâbûngi, myenze bu, ee, civwa bu mu ngondo wa dikumi anyi wa dikumi ne umwe nanku awu, mêmè—mêmè kuloota ngenda ndalakana mu mîdimà, nenku mêmè. . . Ee, nciyi—nciyi ne mwaba wa diya ne muntu nansha umwe kayi uncyukaku to, nenku mêmè mushaale mulalakanyi, anu—anu mulalakanyi wetu ewu. Nenku mwva muumvwe mashika, nenku mêmè kutangila mu ntanta e kumona mudilu. Kadi ndi mwenze anu mfikapu, civwa ndiyaala dya—dya cimenga, ne bavwa ne biina ne mudilu uvwa mu biina abi. Ne pankaci paa biina abi, muvwa mwaba wa ûbâlakana, muvwa balalakanyi bafwanyine kulaala, bwa kulamaku luuya pambidi, ne kubengabo kuuminyina ne mashika, munkaci mwa miine midilu eyi, mu bufuku bwa muvù wa mashika. Nenku mêmè—mêmè mwva ne mashika. Ki mêmè—mêmè kuseemena ku mwine mudilu ewu, bwa mêmè kupetaku kaaluya, ne mwômò amu muvwa mùle ne balalakanyi. Nenku bavwa. . . Ncyakamona nansha umwe wabo to, kadi bivwa byenze bu ne bônso bavwa ne tutanda anyi myaba yivwa cilaadilu cyabo. Ki mêmè kumona bukonde bwanyi wa balume awu, Fletcher Broy.

¹⁰⁰ Nenku Fletcher, mushindu mwine wûndi mmuvùluka's. Yêyè utu mwânà mwîmpè. Kadi eci ncifwanyine kwikalà dileesona kudi bânà bateketé's. Ndi mvuluka ne kukaadi bidimu ndambu, nsongaalume kampanda mulenga kumona, dyende n'James Fletcher Broy, kadi mukabwelakane mu musûmbà mubi, ki yêyè kulabulaye twala twende twa ntwadijilu. Ndi mvuluka muvwaye umbiikidila paanyima paa ridô mu nzubu mwanyi. Ne tatwëndè ukaadi muye mu Butumbi, kukaadi bidimu, ùvwa pambelu apu wimba cindaala wimba ne: "Ku mukuna kwaka kuvwa nkuruse wa kale mukayabale."

¹⁰¹ Ki Fletcher kumbiikidilaye lwà paanyima apu wamba ne: "Mwaneetu Bill, nsambidilèku. Anji teelejaku anu musambu udi papa wimba awu, kadi paanyi's ndi mukanwe maala leelu ewu."

¹⁰² Mêmè kwamba ne: "Fletcher," nsongaalume wa bidimu bitwe ku dikumi ne mwandamukulu, mêmè ne, "kulondu awu njila to." Kadi kaakatelejaku to. Kutungunukaye. Kushaalaye kanwayi wa maala a kapywa wa utokola ne nzaba. Ki mukajende kumushiyaye, bânà bende, ne patukaadi twakulangana apa yêyè ukaadi. . . Kadi Nzambi mmumanye ne ntu mumunange.

¹⁰³ Mêmè kuya bwa kumusambidila, anu mulalakanyi wetu ewu. Mêmè kuya bwa kumusambidila, muneemu emu anu abidi adi panshi aa, ùvwa mutapike mputa musangu wûmvwà kaaba aka bwa Bitampi Mwandamutekete ewu. Mêmè kwamba ne: "Fletch, ndi ne ndambu wa nkooici kuntu kwaka yîndi—yîndi muswe kukupeesha."

Yèyè ne: “Kwenji nanku to, Mwaneetu Bill.”

Cibi mvwa—mvwa mumanye ne kavwaku ne bilàmbà to. Ki mèmè kwamba ne: “Kwèna wangata bilàmbà bwa cinyi?”

Yèyè ne: “Huh-uh.” Ki kubandulukaye e kuntangila ne: “Wamonu’s, wèwè’s udi anu mumanye cìndi mufwanyine kwenza naabi. S’nènkabyèyèkè nkakwacike anu maala.”

Ki mèmè ne: “Nènkupèèshè ndambu wa mfranga, Fletch.”

¹⁰⁴ Yèyè ne: “To, kwenji nanku to, Mwaneetu Bill. Ncyèna—ncyèna—ncyèna muswe bwa wèwè kwenza nanku to.” Yèyè s’mmuntu anu wetu wa bushuwa ewu, mu yèyè, kadi mmushaale kanwayi wa maala a kapyà ne mulalakanyi. Ne mu—mukajende kwangataye njila mubi. Nenku, kaa, kadi maalu ònsò kwenzekelawu mukwacikwetu awu.

¹⁰⁵ Nenku ndi mwenze anu ntabuluka, kumpala kwa mèmè kutabuluka, Fletch kungambilaye, kungambilaye mu ciloota amu, wamba ne: “Billy, mèmè—mèmè nènkukèbèlè mwaba, Mwaneetu Bill. Wèwè uvwa mudiishe bânà baanyi pavwabo ne nzala.” Ki kwambaye ne: “Wèwè ukaavwa kudibo bu tatwàbò. Mpindiyewu mèmè nènkukèbèlè mwaba apa bwa wèwè kupeta luuya.” Ki twètù kuya twenda twendakana ku myaba ya balalakanyi ayi ne ndekeelu wa byònsò kuya kafika pa mwaba kalpanda, yèyè ne: “Mèmè nènsombelè apa.”

Ki mèmè ne: “Mèmè nèngānji kuya lwà kuntweku bwa kumonaku ní ndi mwa kupeta mwaba.”

¹⁰⁶ Ki mèmè kuya, ne kutangila mu mídima amu, bufuku bwa mashika. Ki mèmè kudyambidila ne: “Anji elabi meeji ku bwalu abu. Musangu kampanda, Nzambi wa Bukole bwònsò kundekela ndombola Ekeleeziya Wende. Musangu kampanda, kundekela Ye nyiisha Evanjeeliyo Wende ne mmona misuuka yisungidiibwa. Balume ne bakaji bafumina mu nyungulukilu wa buloba, bwa kwakulaku naanyi bwa ndambu wa tusunsa. Kadi mpindiyewu ki mèmè ewu, mulalakanyi, ne muntu nansha umwe kayiku naanyi dijinga. Ne ki mèmè kuumvwe mashika eku. Ndi ne cya kwenza ncinyi?” Dìbà adi mèmè kutabuluka.

¹⁰⁷ Mèmè kwambila mukajaanyi, kwamba ne: “Pàmwāpa cidi cyumvwija ne Fletch udi mu dijinga kampanda.” Ki twètù kuyaku balwijakaje, bwa kumona ní tuvwaku bafwanyine kumupeta. Ki mwanaabo wa balume kumupetaye. Yèyè uvwa musòmbèle muneemu emu ne Weidners. Kwòkò kudibo ne . . . benda mushinga wa tubalu ne bikwabo aku; ùlààdila mu ditumba dya cikumbi kampanda anyi cintu kampanda. Mèmè kuyaku. Mèmè kudyambidila ne: “Ee, nebikengele anu mbilekele nanku’s.”

¹⁰⁸ Pa nanku ndi mwalukile mpindiyewu mfumina ku Canada, ne Fred ne bakwabo, dituku adi. Nenku mu meeji aanyi, nkaavwa mucipangandike ne: “Piikalabi ne bantu aba kabavwa baswe

kuteeleja Mukenji wanyi, eyo, kabavwa anu benzejiibwe bwa kuwuteeleja to.” Mvwa nyiisha mpindyewu kukaavwa bidimu bu makumi asatu ne bitaanu. Kadi bidimu dikumi ne bitaanu too ne ku dikumi ne mwandamukulu bya ndekeelu ebi ncyèna mwenze cintu nansha cimwe to anu bwa Mukalenge. Ndi muditacishe bwa kwikala ne nsòmbelu wa sheemàsheemà menemene Nende bya nciyi ngamba dīyì to too ne pavwaYe wanji kungambila dyambedi, bintu byònsò.

¹⁰⁹ Bantu badi bamba ne: “Mpindyewu Mwaneetu Branham yèyè munwāmbile ne udi ulwa, nwavulukaayi, nwikalaayi badilongolole bwa disangisha dilelela, bwalu yèyè udi ulwa mu Dinà dya Mukalenge. Yèyè kèna wenza cintu nansha cimwe to padi Mukalenge kayi mwambe. . .” Ncya bushuwa. Mvwa mèmè ngindila too ne pavwaYe ungambila. Ncivwa ntentemukaku Yèyè kayi mungambile to. Ne pashiishe Yèyè wakafika mu mushindu wa ne, munda mwa ndambu wa ngondo mishaaale eyi, Yèyè kī mmungambileku kantu nansha kamwe pa bidi bitangila myaba ya kuya to.

¹¹⁰ Pashiishe mèmè kufuma ku Canada, ne Fred kungambila ne. . .Anyi Mwaneetu Roy kungaawilaye ciloota cyende, patuwwa yèyè ne mèmè ne Mwaneetu Banks tuya pamwe mu kashinyi, pabwipi menemene ne twètù kushiyangana.

¹¹¹ Nenuk pashiishe dituku dyàkalondà twètù kupweka kwa Mwaneetu Fred. Nenuk mwanende wa balume, Lynn, kavwa kumbelu to, pa nanku yèyè kavwa mwa kulwa neetu to. Bivwa bikengela bwa yèyè ne mukajende kwindilabo. Kwambulaye mukajende mwaba awu ku Rosewood aku. . .anyi ku Melrose, mu Saskatchewan.

¹¹² Ki mèmè ne Billy twètù kulwa mu cisemuna cya Mwaneetu Fred. Bufuku abu twàkenza lwendu mu citupa cinene cya bufuku, ne mu dituku dyàkalondà. Nenuk paakacyabu mu dinda tukaavwa buumuke ku Helena, mu Montana, ne tuvwa twenda tulwa batangile ku mukàlù.

Nenuk mèmè—mèmè ntu mwa kushaala mutabale too ne pa dībà diipacila pa citeema, nenuk mbanga kuumvwa tulu tunsuma. Nya kalaala. Kadi Billy, yèyè utu muswe kulaala too ne padibu bucyu mu dinda patukaadi twipacila dībà dikumi, padi kwìsù kutooka, pa nanku bitu bitwenzaku bilenga bwa kuya mu lwendu pāmwe.

¹¹³ Pa nanku mèmè—mèmè kubiika pabwipi ne dībà inaayi ne kwasa lwendu, ngendesha mashinyi, ne Billy uvwa mulaale. Twètù kubwela mu mwaba kampanda ne mèmè ndyelela meeji ne: “Udi mumanye mudi bwalu anyi? Dimwe dya matuku adi panshi aa, pàndi anu ne ngaapeci mushindu wa kuya ne mukajaanyi kuntwaku. . .Kadi ncyakumwambila ne cingikalà mwa kuya kenza ncikampanda to. Kadi ndi mufwanyine kukafika kuntwaku, ne pashiishe ndi mmwambila ne: ‘Ndi

munange mwaba ewu bilenga be, kabyena bikengela bwa twêtù kuya mungà mwaba to. Tushaale anu piine apa.” Ne kwine aku nkule ne bantu, ku ntanta wa kilomeeta cinunu ne nkama mwandamutekete ne makumi asambombo ne mwaba kana wònsò. Nwamonu anyi? Lwà mu cipeela menemene mwamwa. Mémè kudyambidila ne: “Balumyana, aci’s neciikale cilenga be! Kabyakukengela bwa mémè kukosesha nsuki to, ne kabyakukengela bwa mémè—mémè—mémè kwikala muvwale ne ku mènù. Kadi nêngiikalè anu muntu wa—wa ku mikuna anu wetu wa ciibidilu ewu, cîntù mémè mwine mujengejinge kwikala aci.” Ki mémè kwamba ne: “S’ndi ne ndambu wa bingoma, bidibo bampeeshe kudi bantu kampanda, ne nêngiikalè mulombodi wa mu meetu mu mushindu wûtù kacya kuyiku mwanji kuumvwa to. Aci necinsankishe anu menemene. Pashiishe bu Nzambi mwa kungambila bwa kuya kambila muntu cintu kampanda, nêmpatukè lubilu nye kamwambila kadi ngaalukile cyakabidi. Nenku nênkwacishèku Bud, nenku netwikale bulelela ne mwaba wa cya bushuwa mwaba ewu.” Mvwa ngeela meeji ku cyòci aci.

¹¹⁴ Twêtù kubwela mu nzubu kampanda wa cidiilu, bwa kudya, kaaba kakese ku mukuna aku, tukaavwa twipacila anu dibà mwandamutekete. Dibà dikaavwa dyenda dipita ndambu, ki mémè kubiisha Billy. Kasoloonyi kakaavwa katujike, nanku bivwa bikengela bwa twêtù kupeta kasoloonyi. Nenku twêtù kubwela mu mwaba mukese ewu, mu nzubu mukese wa cidiilu ewu. Nenku patucivwamu apu, muntu kulwaye dinsambu dya mùsèèsù adi, pàmwāpa munkulumpileku mémè ndambu, kadi yêyè uvwa ne mmwenekelu anu wa muntu mulume, bwanyi mémè. Ûvwa muvwale cinsalabeeta, jàketè wa cinsalabeeta, bikumba bya dibànda naabi pa kabalu, cifulu cifiike, ne mwedi wa pa mushiku mushindu ewu, mutooke bu nêjè, nsuki mipwekele lwà mwinsi, paanyima paa cifulu cyende aci. Mémè kudyambidila ne: “Wawa’s udi ne mmwenekelu wa muntu mulume.” Kayi muntu kampanda wa muteketangane, wa lulèngù, ne cifwanka ku mishiku, ciipacila bule *ebu*, musòmbè muvwale ciputulu, ku nyungulukilu wa lutanda awu anyi ciina cya dyowela aci to, muntu kampanda wa ku Esete wa difu na nyingu, bu nanku. Nwamfwilaayiku luse bwa cyakwidi aci. Kadi, nansha nanku, mulumyana awu uvwa ne mmwenekelu wa muntu mulume, bwanyi mémè; mushilàkàne, mukayabale. Byenze anu bu ne yêyè uvwa musòmbèle mwaba uvwa Nzambi mwenzele muntu bwa kusòmbelayè awu. Nenku mémè mvwa mmukaakala’s.

¹¹⁵ Kubwelaye mu nzubu wa cidiilu awu ne kulombeshaye ma-crêpes. Muvwa bantu batwe ku dikumi ne bataanu, anyi makumi abidi. Kukengelabi bwa kwelaye nyashi. Ne nwènù’s nutu bamanye mùtù bamwe bantu. . . [Mwaneetu Branham udi widikija mushindu utubo badikanda bwa kwela nyashi—Muf.]

Mfwilaayiku luse. Kadi kushiyaye lunyashi lunene lwa muntu wa mubidi tumatuma, wa mwitu awu ne: “Hii-tihe!” Ekelekele, kwenzabi anu bu ne madidiishi akataayika’s. Pakeelaye nyashi ayi, muntu nansha umwe kaakadidinga kwambaku cintu to. To, mukalenge. Mémè kwamba ne: “Billy, ki muntu wa pa wanyi mwoyi nyèyè awu.”

Yèyè ne: “Kaa, papa, kwambi ne udi muswe kwikala bu . . .”

“Ki cyôci aci, ki mémè awu bwa kumpala kutuyaaya eku.” Nwamonu anyi? Mémè kwamba ne: “S’ki mémè awu.”

¹¹⁶ Ki mémè kushaala musòmbè mwaba awu ndambu, ne Billy kubanduluka kuntangila kadi kutungunukaye ne kudya macrêpes ende awu, kadi mémè—mémè nkaavwa mujikije aanyi. Mu tusunsa tukese cyanaana, muntu kampanda, mu kaacisòmbelu kàwà lwà kumpala kwetu aku, muvwaku mabaya mushindu *ewu*, paanyima paa kaacisòmbelu apu, nciyi mémè mwa kumona lwà mu nyungulukilu amu to. Muntu kampanda kujuukaye, mwikàle anu menemene ne lukebu bu lwanzi, wa bidimu bitwe ku makumi mwandamutekete ne bitaanu, kaamuntu kakese menemene. Bilàmbà byende bimulamate pambidi, bya biteetela. Kadi mulunda wende uvwa mujuuke pamwe nende awu uvwa m’Fletcher Broy, anu menemene’s, ne mvyu mimupwekele mu mpala. Ki Billy kukenzakanaye, kwambaye ne: “Papa, wawa’s mmwenze anu bu wèwè ne Fletcher.” Nudi mwa kudifwanyikijila mûngààkadyũmwà’s. Nenu muntu wa mukese awu, uvwa mufwanangane naanyi mémè awu, uvwa wenda utetuka. Nwènù nudi . . . Bavwa biimanyine lwà ku mudilu wa cituudilu, ne mishi pambidi pajima, kwisù manyaanu. Ngeela meeji ne cyakudya cyabo cya mu dinda aci, bwabo bônso babidi, mulumyana awu uvwa ne cya kwikala mufute meeyà makumi abidi, pàmwāpa dikopo dya café anyi cintu kampanda. Mwoyi kuntupikawu munda. Ki mémè kutangila. Ki Billy kwambaye ne: “Mbwalu kaayi abu kûdì?”

Mémè ne: “Kakwena bwalu to.” Ki mémè kutangila aci, nenku kunyungulukabo e kupatuka.

Yèyè ne: “Papa, mbwalu kaayi’s?”

Mémè ne: “Kakwena bwalu to.” Nenu kubwelaye mu mashinyi. Mémè kwamba . . .

Yèyè ne: “Bidi mwa kukutacisha bu wèwè mwa kwendesha kabidi anyi?”

Mémè ne: “To.”

Yèyè ne: “Mémè’s nciidi ne tulu kwisù.”

¹¹⁷ Pa nanku kuyaye mu tulu, ne mémè kupweka ne njila mwikàle ngendesha lubilu lukole, lwa lwipacila kilomeeta makumi mwandamukulu ne mwandamukulu ku dîbà dimwe, mu cisemuna amu, pa mukuna, nya mwipacile ku—mukàlù aku, mpweka mutangile ku . . . Ndwa mutangile kumbelu ku

Arizona, kadi nkaavwa mpindyewu mbwela mu Utah. Nenku pânkaavwà mfikaku apu, ngenda mpweka nguumukila ku mikuna, mu ntanta wa wipacila kilomeeta makumi asatu ne ibidi ne cimenga, byenze anu bu ne. . . Nukaadi bumvwe bwalu abu, pâmvwà munulondele bwa mu dinda pa bidi bitangila nshindi, ne bintu byônsò ebi, mushindu uvwa cintu kampanda. . . Muntu kampanda kubangaye kuyiikilangana naanyi, Dîyî dyanze menemene anu munudi nuumvwa dyanyi mêmè emu. Ndi mumanye ne bidi byumvika bu muntu munyunguluke mutu. Kadi anu mungăfumu ku dyamba mēyî aa ne, “Kacya nkaadiku munwămbile cintu kampanda kaciyi cya bushuwa anyi?” Ki Dîyî kampanda—kampanda kubangadi kwakula. Pàanyi ngakula Nende.

118 KwambaDi ne: “Kumbaja mpàngù yebe ne newikale mushindu awu.”

Mêmè ne: “Mukalenge, ncyêna muswe kwikala mushindu awu to.”

119 Dyôdi ne: “Mukajeebe neakushiye pende. Kaakwikala musômbèle mu tukuna twatwa mushindu awu to. Nenku wêwè neushaale mulalakanyi anu muvwa ciloota aci cikuleeje ne ki muwikala amu.”

120 Mêmè kwamba ne: “Ncyêna muswe kwikala nanku to, kadi. . . Ncyêna—ncyêna—ncyêna muswe ngikale ne nsômbelu wa mushindu wawa to. Ndi—ndi muswe kwenza cintu cya cishiilangane. Kadi bavwa—bavwa bangambile ne—ne Wêwè wăkambiikila bwa kwikala mu—muprofeta, nenku ndi muswe kwikala musômbèle mu cipeela bu muprofeta.” Kadi mwva mfila kabingila kaanyi mêmè bwa ngaamona mwa kwikala ntwa buluwà; bwa dyakalenga dyanyi mêmè mwine.

121 Ki Yêyè kwamba ne: “Kadi abu’s bavwa mbaprofeta baa Dipungila Dikulukulu. Wêwè udi mubiikidiibwe bwa kwikalaku mu mudimu mutambidile aci.” Yêyè ne: “Wêwè udi ne mapà àbûngî pa kuumusha cyôci aci. Wêwè udi mubiikidiibwe bwa kwikala kusambidila babeedi ne kuyiisha Evanjeeliyo. Kabidi mu mushindu wa bapostolo, udi mumanye pa—pa bidi bitangila maalu matambe bunene, mapà manene àbûngî.” Yêyè ne: “Bwa cinyi udi windila bwa Mêmè kukusaka musangu wônsò wûdi utentemuka? Dyebe difutu didi penyi?” Dîbà adi ki mêmè kuumvwa. Ki pashiishe Yêyè kwamba ne: “Udi muvuluke anyi?” Nkaavwaku munulondele. . . ? . . . “Udi muvuluke civwa Mwaneetu Roberson mukwambile mu ciloota cyebe, mu ciloota cyende, anyi cikeena-kumona cyende anyi? Bwa ne wêwè uvwa mwenze mwâkenzà Môsà. Wêwè’s ukaadi mupwe mwoyi cyúvwà udyumvwa bwa cisamba cyebe. Ukaadi mupwe mwoyi dibiikila dîmvwà Mêmè mukubiikidile ne divva ndya cinyi.”

122 Ndi mushiyeshiye babeedi balaale panshi. Ndi muswe bwa Mukalenge angambile kwa kuya ne kwa kubenga kuya. Abi’s

mbibi. Nkaadi mudyèlèle meeji mabi a cyena bundu, ne bwalu nyawu bantu kî mbateeleje Mukenji wanyi. Nenku nwènu biikale. . . Kabyenzekiku to bwa mèmè kufwanyikija nsòmbelu wa mpindyewu byenze bu wa Mòsà to, kadi cidi menemene anu cyàkenzà Mòsà aci. Bantu kabaakaswa bwa kumuteeleja to paakalwaye bwa kubasungila, nenku kubalekelaye e kuyaye mu cipeela, kadi Nzambi kumwalujaYe. Kadi yèyè ukaavwa mupwe mwoyi ntanta mule bantu bavwa mu dikenga abu.

¹²³ Ki dîbà adi mèmè kwamba ne: “Mukalenge, piikalabi ne. . . Mmunyi mùndi mèmè, ncyà bushuwa’s, nciyi ne kalaasa kalonga to, ne dilonga dya kalaasa kashaadile edi, mmunyi mùndi mufwanyine kukumbana? Ne bantu mbafwanyine kwimana mu milongo ne myaba yònsò, bwa kuteeleja Evanjeeliyo mupwekele ewu.” S’ncitambidile, s’ncitambe bunene mpindyewu kutamba muvwaci mu Dipungila Dikulukulu. Yèyè wàkabànda mu Dyulu ne wàkapà bantu mapà. Nwamonu anyi? Yesu Kilisto umwèumwè awu makeelela, leelu, too ne kashidi. Pashiishe mvwa ngaakula, ki mèmè kuumvwa Dyòdi dyakula naanyi. Ki kunshiyadi.

¹²⁴ Nenku mèmè kwamba ne: “Billy.” Kadi yèyè uvwa mu tulu tukole. Mèmè ne: “Billy, awu uvwa ngwèwè anyi?” Kadi yèyè kayi nansha ubiikaku to.

¹²⁵ Ki mèmè kudyambidila ne: “Mukalenge Nzambi,” mèmè kutekesha lubilu lwa mashinyi, “eci cidi cyumvwija cinyi?”

Ki mèmè kwamba ne: “Billy. Billy.”

Yèyè ne: “Udi ukeba cinyi?”

Ki mèmè ne: “Wèwè nguvwa wakula naanyi awu anyi?”

“Bwàlà bwanyi. Bwa cinyi?”

¹²⁶ Ki mèmè ne: “Ndi muswe nkwambile bwalu kampanda. Ndi muloote ciloota kî nkwanji kwenza ntanta to. Udi muvuluke mùvwà mumone muntu uvwa mufwanangane naanyi ne Fletch amu’s? Ukonke maman pawikala ukàadi mwalukile ku Tucson, mvwa mumwambile ciloota ciine eci. Nenku, Billy, kudi cintu kampanda munkaci mwa kwenzeka, Cidi munkaci mwa kutungunuka patudi twakulangana apa. Cintu kampanda civwa munkaci mwa kwakula naanyi, kadi mèmè—mèmè mvwa ngeela meeji ne Civwa ngwèwè.”

¹²⁷ Kuntangilaye mu mushindu mwenze bu wa pabwawu, ne kwindilaye ndambu, tucivwa anu batungunuke ne kwenda kuya mu mashinyi. Pa nanku, ndambu wa tusunsa, kwalukilaye cyakabidi mu tulu. Kadi mèmè mvwa anu ngendesha mashinyi, ngenda ngeela meeji ne: “Civwa cifwanyine kumvwija cinyi ciine aci?” Mutungunuke anu ne kwendesha, anu mu njila menemene amu, nenku, dyakamwe, ki Cyòci eci cilwa cyakula cyakabidi.

¹²⁸ Ki Yèyè ne: “Alukila! Ncyakakwambilaku, ku ntwadijilu kwaka, bwa kwenza mudimu wa mutangadiki anyi? Musangu

wûngàakakubiikilâ, kwinshi ku musulu kwaka, Ncyakambaku ne: ‘Anu mwàkatumiibwâ Yone Mubatiiji bwa kudyanjidila dilwa dya kumpala’ anyi? Yone kavwa mutambe ne muprofeta anyi? Yesu’s ngwâkamba nanku, Yèyè mwine ne: ‘Cinuvwa baye kamona ncinyi, muprofeta anyi?’ Yèyè ne: ‘Mutambe ne muprofeta.’”

129 Dìbà adi cyònsò aci kubangaci kumvwila mu meeji. Mémè kubanga ku—kudikonka. Pashiishe kumvulwijaYe kabidi bwa—bwa cisamba. Mushindu uvwabi ne, pâmvwâ ngenza civwa Mòsà mwenze, mmunyi muvwa Mòsà mwa kufika padi bantu mu cipeela? Ne mémè mmushindu kaayi wûmvwâ mwa kufika padi bantu mu cipeela? Cintu anu cimwecimwe aci menemene. Pashiishe kulwaci ku eci, Tiimote Mwibidî 4. Nudi nuvuluka patwakalambula ekeleeziya mu dinda adi, kukaadi bidimu makumi asatu, bamwe baa kunudi nwênù beena kale abu, paakandeejaYe mici ayi ne mémè kuyikuna ku nseke yònsò yibidi anyi? Nudi bavuluke aci anyi? Nudi bavuluke cikeena-kumona aci. Byònsò mbifundiibwe mu mikanda ne biikâle bisanganyiibwa pa mikaba ya mêyi ne byònsò. Kukaadi bidimu, mushindu wûngàakamòná byòbì ebi ne nciyiku—nciyiku mwa kusambakaja ba-Unitaires ne ba-Trinitaires to. Mémè kwimana pankaci paabo ne kukuna mici eyi, ne yôyi ayi ki mici yimwepele yibidi yâkâkwàmàku mamuma. Nunku mémè... Mici yònsò yakaleepa too ne pa bule bwa mètres citèèma kadi kwimana. Eyi yôyi yâkabànda too ne mu Dyulu; myapula ku ditamba dimwedimwe adi. Nwamonu anyi? Dimwe ku luseke ne dimwe ku luseke lukwabo, nunku mémè kuàpula. Nudi bavuluke cikeena-kumona aci. Nwamonu anyi? Ncifundiibwe mu mikanda ne cidi cisanganyiibwa mu bwalu bulonda bwa nsòmbelu wanyi ne byònsò. Ki yôyi kubànda too ne mu Dyulu mushindu awu, lukasalukasa. Ki Yèyè kwamba ne: “Olola byanza upoole bimuma.” Nunku dìbà adi mémè kusangana bimuma bimwebimwe abi mu nkuruse amu, pângààkaasà lubilu kuyaku. Ki Yèyè kwamba ne: “Enza mudimu wa mutangadiki. Ukumbaje mudimu webe wa bwambi. Cikondo necilwe ciikalàbo kabayi batwala dilongesha dishindame to.’ Kulekedi dìbà adi to. Tungunuka anu ne kuya.” Byònsò abi kumvwilabi mu meeji.

130 Ki dìbà adi mémè kuvuluka Marilyn Monroe, nsongaakaji ûngàakamòná ufwa bu lumingu lujima nanku awu kumpala kwa kufwaye awu, ne muvwabo bamba ne mmudishipe yèyè mwine, pende kayi mudishipe to. Mémè nkaavwa mumane kubambila bwalu abu, kwine kwònsò aku, pa civwâ mwa kwenzeka, nunku kwenzekaci. Ne mwakenzekabi bwa batuucyanganyi baa mànkómò abu kuntu kwaka; umwe uvwa mwa cya kushipa mukwende. Mvwa mutompakaje nsongaakaji awu. Kudi nsongaakaji mukwabo kuntwaku, mwanaabo wa tatwëndè mukwabo udi—udi—udi n’Danny Henry. Dya nsongaakaji mwine awu nganyi apa? Jane Russell. Mwanaabo

wa balume wa tatwëndè mukwabo, nsongaalume wa ba-Baptistes.

¹³¹ Nenu mvwa munkaci mwa kuyiisha mu Los Angeles, ku didya dya dinda dya Beena Kantu-ku-byanza. Nenu Cintu kampanda mwaba awu mwikàle ntandisha malongolodi awu, ne mwaba awu kusòmbe muntu uvwa kumutu kwa Assemblées, ne bààbûngì baa ku beena myânzù mitumbuke bavwa bakungwilemu. Nenu ndi mwenze anu njikija kwakula ne mbanga kuumuka pa cibumba cya ku cyambilu, mwikàle ndilongolola . . . Bwalu, Mukenji uvwa munkaci mwa kutangalajiibwa mu—mu—mu ditunga dijima, ku cisanji, nenu bivwa bikengela bashintulule. Mu dîbà dya kushintulula adi, mbenze anu bakosa cisanji, dîbà adi, bwa kutangalaja Mukenji awu, ne kwalukila bwa kumanyisha ku tudyomba. Nenu mêmè mvwa nsanganyiibwa ku Clifton, kutùtù twenzela didya dya mu dinda adi. Kadi pâmvwà nguumuka pa cibumba cya ku cyambilu cya citumbuke mutangile ku cya cishaadile apu, nsongaalume kampanda wa mmwenekelu mulenga kwîsù wa bidimu biipacila ku makumi asatu, kulwaye lubilu ne kungeelaye maboko ku nshingu. Kwambaye ne: “Dyanyi ndi Danny Henry.” Nenu nciyiku mumanye ne uvwa uleeja bintu abi ku télévîsion mmwanaabo wa balume to. Nenu, uh, télévîsion awu uvwa uleeja maalû a beena Kilisto baa Beena Kantu-ku-byanza. Ne yêyè awu uvwa n’Jane Russell, nsongaakaji mwende luumu wa mu sèndèmâ awu, mwânà wa tatwëndè mukwabo. Mamwëndè utu muiyishi wa beena Mpenta.

¹³² Nenu dîbà adi paakabanga nsongaalume awu kulwa lubilu kûndi, ne kungeelaye maboko ku nshingu apu, kwambaye ne: “Nzambi akubeneshe, Mwaneetu Branham.” Yêyè ne: “Ndi ntekemena ne eci kaciyena cyumvwika bu cya cinyangakaja cijila to, kadi, bwa wanyi paanyi mushindu wa kucimona, Diyiisha adi ndifwanyine kwikala nshapita wa 23 wa Bwakabuulwibwa.” Kadi mmwenze anu wamba nanku anyi, umba ubanga kwakula mu myakulu. Nsongaalume uvwa kacyakacya kayiku mwanji kuumvwa cintu bu nanku to, Baptiste pa bidi bitangila dingumba’s. Nenu mmwneze anu . . . Kushaawaye mutookoloke, kadi kuntangilaye. Kupangaye cya dyenza. Kudi bantu kaaba aka bàvwàpu. Uvwapù anyi, Fred? Mbanganyi bàvwàpu mwine musangu awu? Eyo, nyawu badiku basatu bajima mwaba ewu, bàvwàpu mwine musangu awu’s. Ki kupangaye cya dyamba’s.

¹³³ Kadi kuvwa mwaba awu mukaji munene wa katanku wa beena France musòmbe mwaba awu. Kukatamukaye mwaba awu, kwambaye ne: “Mona’s, aci kaciyena cikengela dyumvwija to. Civwa m’Français anu pa yôyi.”

Nsongaalume awu wakamba ne: “Mêmè ncyèna mumanye mwaku wa Français nansha umwe to.” Kadi mukaji awu uvwa mufunde civwaye mwambe aci.

¹³⁴ Ne pashiishe kuvwa muntu mulume musòmbe mu ditumba, kwambaye ne: “Aci mmwômò. Mémè ndi mufunde cyãmbiye aci, m’Français.” Lwà mundekeelu menemene amu, muntu mulume wa nsuki ya mitookoloke, ne mmwenekelu wa kwîsù kulenga, mwimanyine kuulu mweyemene ku cimanu, kulwaye kumpala aku ne kupalakajaye bivwa bifunda abi. Yêyè awu uvwa mwandamunyi wa ku O.N.U., bwa Français. Nenku ewu muntu pende lwà mwaba ewu uvwa m’Victor Le Doux, wa mu ekeleeziya wa Arne Vick mwamwa, nenku ùvwa mucifunde. Ne mémè ndi ne dyumvwija dyaci.

¹³⁵ Teelejaayaaku eci, ní ndi ne mushindu wa kucibala.

“Mémè, Victor Le Doux, ndi Français mukùna ku dikàsà; mwena Kilisto mulediibwe cyakabidi, mùle tente ne Nyuma Mwîmpè. Kwanyi kumbelu kudi nomba wa 809 North Kings Road, Los Angeles 46. Ntu ntendelela mu Bethel Temple, mwa Pasteur Arne Vick, mpaasata. Nkudimwinu mulelela wùndi mémè ngamba patooke, wa ciprofeta cyamba pa Mwaneetu Branham, cifila kudi Danny Henry mu Français, mu matuku 11 a ngondo Mwibîdi, cidimu cya 1961, mu didya dya Beena Kantuku-byanza baa Evanjeeliyo mu Kaabujima. Nkudimwinu mulelela wa ciprofeta aci.”

¹³⁶ Mpindyewu, civwaCi cyambe ncyòci eci.

Bwalu udi musungule kajila kabumbakane, njila mukole, udi mwendele mu disungula dyebe wêwè mwine. . .

Mpindyewu, mémè ndi mwa kuumvwa aci. Byakakengela bwa Mòsà kwenzaye pende dyende disungula. Nwamonu anyi?

. . .wêwè udi musungule njila anu yêyè menemene ne mujaalame, dipangadika dijaalame, ne yêyè awu ki NJILA WANYI.

Musuminyine pa ne, NJILA WANYI, Nyuma mwîmpè mwikàle wandamuna’s.

Bwa dipangadika dya mushinga mukole ne kadiyi dya tuseku edi, citupa cinenaanenaale cya Dyulu ncikwindile wêwè. . .ncikwindile. Dipangadika kaayi dya butumbi. . . (Teelejaayi ne ntema mpindyewu.) Dipangadika kaayi dya butumbi dyùdi mwangate’s we!

Cyòci eci, mu cyòci ciine, ki cyàfikishà, ne ki cyàfikishà ku dyenzeka, bucimunyi bulenga bwa dikema mu dinanga dya Nzambi.

¹³⁷ Monaayi ne, mmwaku wa pa mwanda kumpala kwa mwambikila. Nwamonu’s, Français. Mpindyewu mwandamunyi wa ku O.N.U. awu ngudi mwandamune aci awu. Kadi mwànà wa balume awu kî mmumanyeku mwaku nansha umwe to, kacyakacya kavwaku mwanji kuumvwa—kacyakacya kavwaku mwanji kuumvwa bamba bwa cintu paaci ne ndyakula dya

mu myakulu to. Yèyè uvwa Baptiste. Byakenzeka paabi anu ne yèyè alwe kubwela muntwamu pende cyanaana, ne kuumvwaye mijiki ayi, ne kwambaye ne...kuseemenaye kuntwaku ne kushaalaye mwimane uteeleja mûmvwà nyiisha.

138 Mpindyewu, “mu dinanga dya Nzambi,” dinanga dya Nzambi. Mmunyi mudi aci mwa kwikala dinanga dya Nzambi piikalaci kacyi—kacyi Nyuma Mwîmpè? Nyuma Mwîmpè’s ki dyôdi dinanga dya Nzambi.

139 Mpindyewu, patwakaasa lwendu mêmè ne Billy kupweka ne njila, nwamonu’s, kwasa lwendu twenda tupweka ne njila, Billy kuyaye cyakabidi mu tulu. Ki kwambaCi ne: “Nênkupèeshè cimanyinu cya kashidi.”

140 Nenku mêmè kwamba ne: “Mukalenge, ncinyi...” Mêmè kwindila ndambu kadi cintu nansha cimwe kacyakenzeka to. Mêmè kwamba ne: “Cimanyinu cya kashidi ki cinyi, Mukalenge?” Ki mêmè kwindila ndambu wa tusunsa. Nenku anu dîbà adi mêmè kwambula mèsù bwa kutangila Billy; ùvwa anu mulaale.

141 Ki Yèyè kwamba ne: “Nênkupèeshè cimanyinu cya kashidi,” cyakabidi’s. KwambaYe ne: “Anji tapabi dîsù tûng lwà ku wesete kwa mwaba wûdi usanganyiibwa ewu.”

142 Ki mêmè kukudimuna mutu nunku *ewu* mu cisemuna amu, bwa kutangila; mêmè kutekesha lubilu, nudi bamanye’s. Nenku, kaa, ekelekele, Nyuma wa Mukalenge’s! Mêmè kudyumvwa anu bu ne mvwa mufwanyine kwela lubila lukole ne kudila mwadi’s. Dya ntangila anyi, ki mêmè kumona anu mukuna mwikâlepù ne nsongo mitooke. Mêmè kwamba ne: “Ncyèna mumanye to, ncyèna mmonamu cimanyinu cya kashidi nansha cimwe to.”

143 Yèyè kwamba ne: “Dîna dyebe’s ndifunda pônsò apu.”

144 Mêmè kudyambidila ne: “Ncinyi cyacya?” Ki mêmè kupeta butekete bwa menemene ne kubanga kwimana.

145 Ki Billy kujuukaye ne kwambaye ne: “Mbwalu kaayi abu wèwè?” Ki mêmè kunana byanza byanyi mushindu *ewu*, bisuululu bimata mu cyanza cyanyi amu, kadi pende nèjè munkaci mwa kumata’s.

146 Mêmè ne: “Billy, kudi cintu munkaci mwa kwenzeka. Musangu kampanda ndi mumanye mwaba wûndi mwenzele cilema. Ndi mumanye ne ndi mwele Nzambi mâyi ku makàsà.” Nenku mbyenze anu bu ne ndi mufwanyine kuumvwa bimba musambu awu, ne mmona binunu bya bantu basambakane abu, balema, bilemenda, bampofo, ne beena bidimba byuminyine; kuumvwa korale kampanda, dîyi dya dîyi kampanda dya muntu munene mwende luumu, dimba ne:

Wa bukooya! Wa bukooya! Nyuma mibi
kumusakayi (Nudi bamanye musambu awu.)
Ki Yesu kulwaye ne kupaye mupika awu
budishikaminyi.

147 Mvwa mwa kumona milongo ya babeedi balaadika myaba yônsò, ne kukengelabi bwa mêmè kwimanyika mashinyi. Billy kavwa mumanye ne ncinyi civwà munkaci mwa kwenzeka to. Ki mêmè kubanduluka.

148 Mêmè kwimanyika mashinyi ne kubândisha mèsù ku mukuna aku, ki mêmè kumona tukuna mwandamutekete atu. Mpindyewu, mwaba ewu, pawikala muswe kumona cintu kampanda: Kuvwa nsongo mwandamutekete kumutu kwa mukuna kampanda, mukuna umwepele, ùvwà uya too ne nu ntanta wa kilomeeta yàbûngì. Mukuna wa ndekeelu kumpala kwa wêwè kubwela mu ditunga dikwabo; kakuciyi kabidi mikuna mikwabo to paanyima paa wôwò awu. Nenku wuwwa muye kacya waya kuumukila ku esete too ne ku wesete, mulongolongo wa mikuna awu, ne mwikàle mubwikila kudi nêjè lwà ku lusongo aku.

149 Tusongo tubidi tukese twa mikuna twa kumpala, ne pashiishe lusongo lwalabale; ne pashiishe kakwabo kaalusongo kakese, ne pashiishe lusongo lutambe kwalabala; ne pashiishe kaalusongo kakese, ne pashiishe mukuna munene, mwalabale, muleepa, mubwikila kudi nêjè ku lusongo aku. Ki mêmè kwamba ne: “Mukalenge, ncyèna ngumvwa ne cidi cyumvwija cinyi to.”

150 Yèyè ne: “Nsongo ya mikuna ayi yidi yinga?”

151 Mêmè kwamba ne: “Yidi mwandamutekete.”

152 “Mu dînà dyebe amu mudi maleeta anga?” B-r-a-n-h-a-m, M-a-r-r-i-o-n, B-r-a-n-h-a-m.

153 Kadi muvwa nsongo ya mikuna mitambe kutumbuka yisatu. Yèyè ne: “Nsongo yisatu ayi ki nkokelu wa kumpala, mwibîdi, ne mwisâtù. Wa kumpala awu uvwa ncitupa cya kumpala cya mudimu webe wa bwambi, kakuna kakese; pashiishe nkokelu webe wa kumpala, mutumbukeku ndambu.” Nudi bamanye’s, cimanyinu mu cyanza. Pashiishe kuvwa mpùngà mukese lwà munkaci amu, cikondo cîmvwà mwanji kuteekiibwa ku luseke bu mûmvwà mutambe kucyoka. Bààbûngì baa kunudi mbacivuluke. Ki pashiishe kulwaku dijingulula, nkokelu mwibîdi. Mpindyewu ndi mupete mukwabo, ndambu wa bidimu mwaba ewu wa tusongo anu tukese twa mikuna, nwamonu’s, byalukile bu ne mudimu wanyi wa bwambi kawuvwa mwanji kwikalaku to, ne pashiishe kulwaku mwisâtù awu.

154 Isatu utu nnomba wa dyoya nende, nwamonu’s, mwisâtù awu. Lusongo lùvwà lùlondà luvwa itaanu, nomba wa ngàsà. Ne lusongo lùvwà lùlondà luvwa mwandamutekete, nomba wa dyoy- . . . wa bupwangane, ndekeelu. “Matuku asambombo

nganwakwata mudimu. Dya mwandamutekete n’Sabatu,” ndekeelu wa lumingu, ndekeelu wa cikondo. Nwamonu anyi? Nenku mèmè kwimanyika ne kucileeja Billy. Nenku mèmè kuyitangila.

¹⁵⁵ Yèyè kwamba ne: “Aci, aci cishaale tootooto. Kwôkò anu mpatà mu meeji ebe, uvuluke mwaba ewu, walukile apa.”

¹⁵⁶ Ki Billy kuntuuta cintu pa dikaaya, kwambaye ne: “Papa, tangila lwà ku esete!” Kadi mwakenzekabi mwine’s, ncyèna mumanye to, kadi ku luseke lwa ku esete lwa njila aku kuvwa diyaala divwa diikàle dilakuka kapyà adi. Mu ntanta wa kilomeeta ne kilomeeta ne cimenga cya mushindu kana wònsò, diyaala dya kale dya mushiki mwenzè wa bukooya bwimansha diikàle disanganyibwa mwaba awu ku dyabakaji dya njila aku.

¹⁵⁷ Nèngààlukilè mu budimi bwa bwambi. Amen. Mukulumpe anyi mwànà, kwikàle ne mwoyi anyi kufwa, mèmè nèntumikilè Nzambi too ne paalwa lufu kunshiya mudishikamine. Mèmè ndi mupangile Mukalenge, nciyi mudiswile to. Nansha byòbì ne ndi ngenza. . . Ndi muteeteteete. . . Lekeelaayi ngèlèku eci nunku. Nwamonu anyi? Kucidiku mwaba pa mukaba wa mèyì anyi? Lekeelaayi ngèlèku eci nunku. Ntu muswe—ntu muswe kumona Yesu Kilisto mumweneshiibwe kayi kalema nansha kamwe to. Nenku bânà beetu bàdì bàtèèlejà mukaba wa mèyì ewu abu, ne ekeleeziya ewu, bavuluke kubangila ku leelu ewu ne, cidì cyenze ne kanupeci tulemalema nansha tukese, ne cidì cyenze ne bidimu byònsò ebi kanuyiku mwa kwamba cintu nansha cimwe cikaadiku cyambiibwe anyi cyenjiibwe cidì kaciyi cyenzeke. Ndi ngeela nî nganyi nî nganyi kadyombo bwa kuntwadila nansha cimwe cya ku binunu bya maalu mamba pa cibumba cya ku cyambilu eku, ne mu dijingulula, ne mu didyanjila-kwamba dya bivwa mwa kwenzeka; mbyenzeke menemene anu ku dileeta ne ku dileeta. Mpindyewu, piikalabi ne ekeleeziya udi witabuuja aci, ambaayi ne: “Amen,” bwa ne. . . [Disangisha didi dyamba ne: “Amen.”—Muf.] Kakwenaku muntu pa buloba udi mufwanyine kuleeja cimwe cyanaana to. Kadi bimanyiibwe kudi ekeleeziya udi apa ne kudi ekeleeziya wâlwa paanyima ne: Nzambi Yèyè musake muntu umupicishila mu lubungu, ne yèyè kayi unyungaku to nansha kakese too ne padi Nzambi umwambila, kakwena diitabuuja diswikakajaku to. Awu n’Nzambi udi ukusaka ku cintu kampanda. Nenku cikaadi ciibake mudimu wa bwambi mukafike mu mwaba wa muntu nansha umwe kayiku mwa kwamba dîyì nansha dimwe dya ubengangana naawu to. Kadi kubangila ku mpindyewu, anji lekelaayi ngaakule neenu mu Dînà dya Mukalenge, kumpala kwa nwènù kuteeleja, bwalu ndi ne cya kuya ku diitabuuja. Ndi ne cya kucyenza ku diitubuuja, nansha mèmè ndyelela meji ne ncîmpè anyi ncibi, anyi nî ncinyi. Ndi ngenza dyanyi disungula dya ditambe bwîmpè, nenku pashiishe nye kacyenza. Bwalu kacitu cyanji kwikalaku cya mashimi to, mbwalu ntu anu

mwindile too ne padiYe ungambila bwa kuya kacyenza. Ntu anu mMwindila Yèyè. Pa nanku kacivwa mmèmè to; civwa n'Yèyè.

¹⁵⁸ Kadi, nudi numona's, nansha Pòlò Munsantu munene awu musangu kampanda wakabwela mu lutatu lukole. Ne misangu yàbúngì yikaadi Nzambi mwenzenze bintu anyi mulekele basadidi Bende babyenza, bìvwà biikàle bilema, bwa kujaadika biine bintu ebi. Mpindyewu, tudi bamanye ne bantu batu mwa kwenza bilema, kadi Nzambi kèna mwa kwenza cilema nansha cimwe to. Kadi mpindyewu mèmè mubwele mu budimi bwa buyiishi, ne mwikàle nya mu mushindu wúndi—wúndi nya ewu, díbà adi's bidi bikengela ngiikale ndyanjila kulongolola masangisha kumpala ne—ne kujaalamija bintu. Ne pàmwàpa eci ki cikondo cinene ciine civwà cìlwa citudi bindile aci. Ne ncyà bushuwa ne piikalabi ne “Eci mu cyôci ciine cidì cintu cinenaanaale ciikalà mwa kwenzeja, ne kufikisha ku dyenzeka, bucimunyi bulenga bwa dikema mu dinanga dya Nzambi,” ne aci mmwaku wa pa mwanda kumpala kwa mwambikila, díbà adi ndinanga dya Nzambi, didì diikàle Nzambi adi. Nwamonu anyi? Nenku bidi bikengela bwa dinanga dya Nzambi didikupe kwaka ku mwalu wa mvita ne diimane pankaci bwa cisamba.

¹⁵⁹ Nenku ba-Rickys ne ba-Rickettas aba, badi bapangepange kaneemu mu dyandamunangana aba, ne mèmè mubĩnyike ne “Ricky” ne “Ricketta,” Nzambi mmumfikishe ku dyumvwa ne kabivwa bikengela mèmè kwenza nanku to, bwalu bààbúngì baa kudibo badi anu bânà Bende. Mèmè ndi. . . Kabeena paabo ne cidibo mwa kwenza to bwalu batu benza maalu mu mushindu mushiilangane bikole. Yimwe ya ku ekeleeziya ya kale, ya mashika ya bintu bya kwisùkwisù eyi's yidi naabo, ne nyuma awu pambidi paabo, ne badi menemene mu—mu buloko anu muvwa Izaleela mu buloko amu, anu muvwa Mòsà muye kabasungila ku bupika amu. Bantu anu beetu baa maci ne mèsù aba bàvwà banange Yesu Kilisto, bafwanyine kuMukwacila mudimu bu bòbò anu mwa kumanya ne Yèyè mwine ngwa dikwacila mudimu ne cinyi. Kadi badi mu bupika bwa cyena mangumba cidì cibàmbilà ne: “Kwenji *cikampanda*, ne kwenji *cikansanga*.”

¹⁶⁰ Kadi dibiiikila dya Nzambi didi ne cya kulwa ne: “Ewu yònsò udi muswe kwasa lwendu mutangile ku Buloba bulaya awu, àsè lwendu.” Twètù's tudi mu njila batangile ku Buloba bulaya. Amen. Balwe paabo, bàsè lwendu. Twètù's tudi mu njila bwa kuya katuutakeena ne Kilisto ku cikondo cya nshiiکیدilu. Nenku mvwa muswe kunutwadila cyôci eci bwa nwáfika ku dimona, ne kunuleeja ne, cilema cidì muntu mwa kwenza aci, cibì mwikàle ne meeji matooke.

¹⁶¹ Mòsà ukaavwa mujimije lutatu luvwaye umvwa bwa cisamba cyende bwalu kabavwa baswe kumuteeleja to. Nenku, Mwaneetu Roy, udi umona ciloota cyebe anyi? Nenku

mpindyewu ncyêna mwa kuya, ne mudimu wa bwambi wa mushindu awu, pândi nciyi muumvwe dishiilangana mu mwoyi wanyi pa bwalu abu to, nansha byôbi ne cya bushuwa Nzambi ngudi mungambile. Kadi dishintuluka adi ndidi Mwaneetu Roy...didiye mumone dilwa. Bikengela bwa cintu kampanda cinshitulule, bwalu mêmè, munda mwa mwoyi wanyi, bu mêmè mwa kupatuka kuya kuntwaku ne mushindu wûndi ndyumvwa mpindyewu ewu; ncidi anu ndyumvwa ne bivwa bikengela bwa bôbô kwikala bumvwe Mukenji awu, bivwa bikengela bwa kwikalabo bawûmvwè. Nenku ncyêna ngumvwa lutatu lwa cisamba luvwa lukengela bwa mêmè kuumvwa to. Pândi anu nciyi mwa kuumvwa lutatu alu to, kabyena bikengela bwa mêmè kuya nansha, bwalu ndi mufwanyine kwikala mwena lubombo.

¹⁶² Nenku bidimu byônsò ebi ndi muteete bwa kuMukwacila mudimu ne mwoyi wa lulamatu, nenku ncyakuyaku kuntwaku bu mwena lubombo to. Bikengela bwa mêmè kudyumvwa ne, kî n'Ricky ne Ricketta to, ne kî m'musumbà ewu to. Mbânà baa Nzambi bàdi mu bupika, nenku ndi ne cya kuya kudibo. Pândi anu nciyi mwa kudyumvwa mushindu awu to, nebikengela anu bwa mêmè kushaala ndoofwakana, nyiisha mu bibilu kampanda ne bikwabo, kadi kwindila.

¹⁶³ Ndi ne kaamusambu kakese, ncyêna mpeta mushindu wa kwimba to, ndi muswe anu kunuteelelaku cyanaana. Bânà beetu, ndi anu mukalongolole cyanaana, ncyêna mwanji kukuujija bilenga to, kî nkafundiibwe bîmpè to. Ncyêna nansha mumanye ne ndi mwa kukabala anyi ncyêna mwa kukabala to. Kadi mu cyona cya *Muyengà Wà Mvità Wà Ditungà* ne.

Butumbi! butumbi, aleluuyah! (Nukaadi
bawûmvûmvwe.)

Butumbi! butumbi, aleluuyah!

Mbanganyi? Mu bushuwa bwa bwalu, tukaadi bawûmvûmvwe twêtù bônsò.

Muyiishi wa njila mubànde pa kabalu uvwa
wenda ukosolola ditunga,

Mwikàle ne cingoma pa dikaaya ne Bible mu
cyanza;

Ûvwa wambila bantu baa mu mpàtà amu bwa
Buloba bulaya kampanda,

Pavwaye wendela pa kabalù, wenda wimba
apu.

Mweyemene, mweyemene,

Mweyemene pa diboko dya kashidi;

Mweyemene, mweyemene,

Mweyemene pa diboko dya kashidi.

Ûvwa ùyiisha cilumbulwidi cya kapyà ne
 soufre cilwalwà;
 Ne Dyulu dya butumbi, dya kadiyi ndekeelu
 dya anu bwa babingishiibwe nkaayaabo.
 Pavwaye wenda ukosolola mikuna mubànde
 pa kabalu apu bavwa mwa kuumumvwa
 wimba musambu ewu,
 Pavwaye wenda mubànde pa kabalu apu.
 Kudi bukole, bukole, bukole bùdì bwènza
 maalu adi akemesha,
 Mu Mashi a Mwànà wa mukooko;
 Kudi bukole, bukole, kaa, bukole bùdì bwènza
 maalu adi akemesha,
 Mu Mashi a mushinga mukole a Mwànà wa
 mukooko.

164 Muiishi wa kale wa njila. Nudi bamuvuluke. Nwamonu
 anyi?

Mpindyewu cingoma cyende ncyà kale ne
 cikwate dimòmà, kadi cikaadi cikudika ku
 cimanu;
 Bible wende ukaadi musunsuke bikole ne
 mukwate lupwishi, ne...wa balenga anu
 ku mpuukapuuka menemene; (Aci's ncyà
 bushuwa.)
 Kadi Mukenji udiYe ututwadila
 newutuutakeene neetu mu Dituku adi,
 Bwalu Bulelela bwa Nzambi bucidi bwenda
 anu kwenda.

Bònsò:

Butumbi! butumbi, aleluuyah!
 Butumbi! butumbi, aleluuyah!
 Butumbi! butumbi, aleluuyah!
 Bulelela Bwende bucidi bwenda anu kwenda.

165 Nèngìkalè mwa kuwulonga. Mvwa mwimanyine kuulu mu
 dinda emu pâmvwà mfunda cyôci aci, mêmè kuteeka cyanza
 pa cingoma cyanyi cya kale cìdì cikudika ku cimanu aci. Mêmè
 kudyambidila ne: "Kabyakunenga to."

Cingoma cyende ncyà kale ne munkaci mwa
 kukwata dimòmà, padici cikudika ku cimanu
 apu, (Aci's ncyà bushuwa.)
 Ne Bible mmusunsuke ne mukwate lupwishi,
 ne ngwa balenga anu ku mpuukapuuka
 menemene;
 Kadi Mukenji wende wa mu Bible awu...ku
 Cilumbulwidi dîngà dituku,
 Ne Bulelela Bwende mbutungunuke anu ne
 kwenda.

166 Bulelela bwa Nzambi m'Bible ewu! Eyowa's. Yesu Kilisto udi umwèumwè awu makeelela, leelu, too ne kashidi.

167 Muiyishi wa kale wa njila awu ne cingoma cyende cimucyamakane paanyima, ne Bible wende mu cyaanza, ùwva wende wenda ukosolola mpàtà mubànde pa kabalu, ne ku nsongo ya mikuna, ne panshi upicila mu mìkìdì ne myaba yònsò, wenda uyiisha Bukalenge bwa bidimu cinunu bùcìlwalwà, Cilumbulwidi cya kapyà cìcìlwalwà bwa babi, ne uyiisha Bukalenge bwa Nzambi bwa baakane. Mbulelela. Cingoma cya kale cya Winchester aci cikaadi cyenda cikwata dimòmà. Ne Bible, bòbò—bòbò bakaadi ne mukanda kampanda wa maalu a masandi pamutu paa Yèyè awu. Kadi Bulelela bwa Nzambi buciadi bwenda anu kwenda. Yèyè udi udivwija Yèyè mwine anu wa cya bushuwa leelu ewu, ne ucijaadika, anu mutuYe kwònsò eku amu.

Bulelela bwa Nzambi mbutungunuke anu ne kwenda!

Butumbi! butumbi, aleluuyah!

Butumbi! butumbi, aleluuyah!

Butumbi! butumbi, aleluuyah!

Bulelela Bwende buciadi bwenda anu kwenda.

168 Bwa cinyi? Muntu kampanda wadyakuBwangataku. Bwalu Yesu Kilisto udi umwèumwè awu makeelela, leelu, too ne kashidi. Tuwimbàayi cyakabidi. Mpindyewu tudi basambakane mwaba ewu, ba-Méthodistes, ba-Baptistes, ba-Luthériens, ne bikwabo byònsò. Patudi twimba cipungulujidi cya ndekeelu aci apa, tulabulanganaayi ku cyaanza ne muntu kampanda udi ku luseke kwetu awu, ne pashiishe nebatutangalaje.

169 Nenku mpindyewu, vulukaayi ne, nwênù bìikalà ne cya kuya ku ekeleeziya yenu sungasunga abu, nuyaayi diloolo edi. Nwàngeelelaayiku mpaasata wenu awu mwoyi. Ne—ne pashiishe nwànsambidilaayi, muntu ne muntu wa kunudi. Ne pashiishe kabidi ndi muswe bwa nwênù kuvuluka ne, panwikala kanuyi ne mwaba wa kuya to. . . (Ne pawikala mufwanyine kwikala ne cintu kampanda.)

Paanyima paa diyishi dya Mwaneetu Neville diloolo edi, paanyima paa yèyè mumane kuyishi diyishi dyende, pashiishe ndi muswe kwenza mukaba wa mèyi mwinyika dìnà ne *Mudilu Mukunze Udi Upòdya Wà Cimanyinu Cya Dilwa Dyendè*, nwamonu's, diloolo edi. Mukalenge anubeneshe mpindyewu. Ne lumingu lùlwalwà, nêngìikalè, mu dyalumingu d'ilwalwà, bu Mukalenge mwa kwanyisha, ndi mwa kwalukila cyakabidi bwa kwenza mukaba mukwabo wa mèyi, bwalu nebikengele bwa mèmè kwikala ku Arkansas mu lumingu lùlwalwà elu.

170 Eyo, mpindyewu twimbàayi cyakabidi, ne tulabulanganaayi ku cyaanza mpindyewu.

Butumbi! butumbi, aleluuyah!
 Butumbi! butumbi, aleluuyah! (Mukalenge
 Yesu, beneshaku mishwala eyi...?...mu
 Dîna dya Yesu Kilisto...?...)
 ...kwenda.

Butumbi bwikalè kudi Nzambi! Mpindyewu twinyikaayi mitu yetu bwa katanci kakese cyanaana.

¹⁷¹ Udi mufike anu pa dîbà, Mwaneetu Ruddell. Seemèñaku kuneeku bwa katanci kakese cyanaana usambile. Mwaneetu Ruddell, mukwabo wa ku bânà beetu batudi baswikakane naabo kaaba aka, wa mu nsangilu mukese wa maekeleeziya utudi nende bônso pamwe, utu kayi usungulujangana bilondeshile mangumba ewu. Ne nkaadi muumvwe diimana dya bukutu didi Mwaneetu Ruddell mwimane bwa—bwa Evanjeeliyo. Ne pa nanku ndi—ndi ngamba nunku, Mwaneetu Ruddell, ne byônso bya mu njila wa lwendu... Nzambi katu mulaye bulaalu bwa maalu mapepele bulengeja ne bilôngò nansha. Kadi Yêyè mmulaye mvita, eyowa, kadi Ũtu mulaye bucimunyi. Ki cintu ncyôci aci.

¹⁷² Ndi mvuluka pângàakangatà dyôdi diimana edi bwa musangu wa kumpala, nansha mene maamù wanyi mundedi ne taatù wanyi baakaswa bwa kungiipata kumbelu. Nwamonu anyi? Kadi, kaa, ekelekele, mushindu mwine wûngàakabàbàtiizà mu Dîna dya Mukalenge Yesu's we! Ditekemena dimwepele dîndiku mêmè naadi leelu ewu's mbwa diine diimana adi. Ndi ne disanka dîngi dya ne Mukenji wa Bible, kubangila kudi muyiishi wa kale wa njila awu too ne ku dîbà edi... Nansha mudi bantu baWukwate ne baWupempe ku nseke yônso, ne benze mangumba ne beeleMu twitabaayi ne bikwabo byônso, Bulelela abu budi anu bwenda anu kwenda. Ncya bushuwa. Bucidi anu butungunuke ne kwenda.

¹⁷³ Nzambi anubeneshe, muntu ne muntu, nenku tudi ne ditekemena dya kunumona cyakabidi anu abidi adi panshi aa. Patwamba kufikila kwine aku apu, nenungaanyishileku cintu cimwepele eci mpindyewu, ne badi apa ne badi pa mikaba ya mÿyi kabidi anyi, nwênù bânà beetu? Nwâsambilaayi bwa Nzambi ateekeku munda mwa mwoyi wanyi cintu cindi mujimije mu meeji mabi a cyena bundu kuntu kwaka awu aci. Mbipeepele menemene bwa kupeta meeji mabi bwa bakwabo.

Mwa mwenze muyiiki wa babidi dituku dikwabo ne Mwaneetu Way udi musômbe apa ewu, udi mwimane mwaba ewu kumpala kwanyi ewu. Muntu mwîmpè, kadi mudyundishe meeji mabi a cyena bundu, mushindu mukwabo wa meeji mabi a cyena bundu, menze cintu cimwecimwe aci. Mwaneetu Way, mbipeepele menemene bwa kucyenza; mmumwa ne udi upeta anu kaacintu kakese mu meeji ebe amu, utungunuka ne kudyelela meeji mu mushindu awu. Alukila ukacikenkete ne

Mifundu, kadi umone nî ncyá bushuwa anyi ní kî ncyá bushuwa, kadi pashiishe umukile apu uye kumpala. Eyowa's. Kujimijiku dyumvwa dya lutatu bwa bantu to. Wamonu anyi? Udi ne cya kuvuluka ne bôbò kî mbenza ne musenga wa mabaya to. Badi ne munyiinyi ne mashi, bantu anu beetu baa bantu aba biikàle ne musuuka. Nwânsambidilaayikù, nwênù bônso, nwênù baswe. Nzambi anubeneshe mpindyewu.

Netwinyikaayi mitu yetu ne netulombe Mwaneetu Ruddell ní wikalaku . . .

¹⁷⁴ Wamba ne? [Mwaneetu Parnell udi wamba ne: “Mwaneetu Branham, ndi ne cintu kampanda cîndî njingaku kwamba, ncifwanyine kungangata anu cyabibidi cimwe cya kasunsukila kaa kasunsa cyanaana.”—Muf.] Eyo, mwaneetu. [Mwaneetu Parnell udi wamba bwa ciloota civwaye mulooto.] Butumbi bwikalè kudi Nzambi! Yêyè ewu mmwambi. Muntu kampanda mmufwanyine kwikala kayi mumanye to. Ne yêyè uvwa umwe wa ku kasumbu kavwa, ncivwa mupete dîbà mu dinda emu to, uvwa mu cimwe cya ku biloota abi, cyàmba mûmvwà nya luseke lukwabo alu, nwamonu's, nya ku Wesete, mpatuka nya ku Wesete musangu wa ndekeelu ewu. Mwaneetu J. T. Parnell.

¹⁷⁵ Mpindyewu, nkufwanyine kwikala beenyi badi badikonka bwa mudi bantu baloota biloota, bwa beena ndoota. To, twêtù katùtu twitaba mishindu yônso naka ya biloota ne bintu bikwabo abi to, kadi tudi twitabuuja ne Bible utu mwambe ne: “Nebyenzeke mu matuku a ndekeelu ne, Mêmè nêmpogololè Nyuma Wanyi pambidi paa bantu; ne bôbò nebâmbè biprofeta, ne nebamone bikeena-kumona, ne nebalooto biloota.” Nenu bu mudibi anu ne aci cidì munda mwa bizubu bya Bible, bûndî mêmè naabu mbwa kuciitabuuja ne kuciyiisha. Nenu padi bantu baawula biloota, padi Mukalenge kayi ufila dyumvwija to, tudi tucishiya anu nanku. Kadi cyôci ciikàle cintu kampanda . . . Padi muntu kana yônso wakula mu myakulu, cidì ne cya kwikala cintu kampanda cya bambila ekeleeziya, ne kabidi cidì ne cya kwenzeka. Twêtù katuyi ne cya nanku to, ncifwanyine kwikala nyuma mubi. Cidì ne cya kwenzeka, bwalu dyandamuna dya myakulu nciprofeta. Tudi bamanye ne aci ncyá bushuwa. Pa nanku twêtù tudi tuteeta mwab'ewu kwikala ne nsòmbelu wa Bible anu mudiYe mulongeshiibwe menemene amu. Kakuyi kuumushilaKu kantu nansha kamwe anyi kuKùsàkidila kantu nansha kamwe to, kadi kwikala kuMuteeka mu cyenzedi menemene anu mudiYe amu. Mukalenge abeneshiibwe. Aci ncinkwacisheku mêmè ewu, Mwaneetu J. T., bwa kwitabuuja ne . . . Nzambi mpindyewu katu muntume bwa kuya kadya cibanga pa bidi bitangila mpekaatu to, kadi anu bwa kuya ne katungunuka ne kwenza. Nwamonu anyi?

¹⁷⁶ Tusambilaayaaku mpindyewu. Mwaneetu . . . [Mwaneetu wa bakaji kampanda mu disangisha udi ushiya lubila lukole—Muf.] . . . Muntu kampanda mmufwe cipuuka. Indilaayi

kakese. Sòmbaayi pòlàà, muntu ne muntu. Nwamonu anyi? [Mwaneetu Branham udi umuka ku cyambilu ne upweka mu disangisha amu.]

¹⁷⁷ Taatù wa mu Dyulu, luse ne bwîmpè Bwebe biikaleku ne Mwaneetu Way. Mu Dîna dya Yesu Kilisto, swaku bwa yêye ààlukilè. Mwalujeku, Mukalenge, mupeesheku dikanda ne mubidi tumatuma.

Ndi ngambilamu ne, mwoyi wende wabangi kutuuta cyakabidi! Shaalaayi pòlàà, muntu ne muntu, ne ikalaayi anu nusambila.

Mukalenge Yesu, bwîmpè Bwebe ne luse biikaleku ne Mwaneetu Way, mu Dîna dya Yesu Kilisto.

¹⁷⁸ Kwajiki. Pândi mwimane kaaba aka ku cyambilu eku, kùkaadi mayiisha a madilu mayiishiibweyiishiibwe eku. Mwaba wûndi mwimane ewu, wùkaadi nkama ya bantu misambile mikafika kudi Kilisto ewu. Ndi muye kudiye, mèsù ende akaavwa malèngame, dituuta dyende dya mashi dikaavwa diye. Kadi ncyêna ne cîndi mwenze to anu kusoka kwa Dîna dya Yesu Kilisto, ki dituuta dyende dya mashi kubangadi kwalukila cyakabidi. . . ? . . Mémè bu mwambi wa nkuruse, ndi ngamba aci mu Dîna dya Yesu Kilisto. Yêye kî mmulenga mulayà anyi? Dîsaamà dya mwoyi mwimane. Nwamonu anyi? Mémè ndi ne kusakidila kwàbûngi bwa mudici cyenzeke mpindyewu mene, pamutu paa kwindilaci too ne patuvwa mwa kwikala buumuke baye. Nudi numona ngàsà wa Nzambi anyi? Mukalenge abeneshiibwe!

Twinyikaayaaku mitu yetu.

¹⁷⁹ Taatù wa mu Dyulu, tudi tuKwela twasakidila mpindyewu bwa bwîmpè Bwebe ne luse Lwebe. Wêwè utu misangu yònsò anu munkaci mwetu. Mpaanyiku, Mukalenge, Maanyi mu mwëndù wanyi. Mpaanyiku Dikombo dya—dya—dya—dya Mukalenge, bwa ngaamona mwa kuDyolola, pa babeedi ne badi mu ntatu. Bwa ngaamona mwa kucitwala pa . . . bwa kutwadila badi mu lukengelu disungidiibwa, ne cilumbulwidi kudi badi baDibenga. Enzaku nanku, Taatù. Tudi tuKusakidila bwa bwîmpè Bwebe bwònsò, mu Dîna dya Yesu Kilisto. Amen.

Mwaneetu Ruddell, Nzambi akubeneshe, mwaneetu.



KWIMANA PANKACI LUA63-0623M

(Standing In The Gap)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 23 a ngondo mwisambombo, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kââdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org